

Jesocristopa Huanodsa itedsejemacca ima ahuato inanajaro Apocalipsis

Jesocca dodosse Huano jadahi tocajadsapa dsama bedeni onini Patimo passo imenidsa huittidsacossajarodsa madijari. Aja Romanodenicca tamine Jesocristo tahimaridsa jipera tadsa Huano dama inadsa Patimohuaji dosse inajari. Nahi Patimohuaji madijaripa pina toponi cocorodsa huedsajarissa najari. Nahidsa madidsapa pina pocca huadassa nadsa Dio Corime itedsejemacca ima pohuadsa ahuato inanajaro. Nadsapa Huano pohua qqui tajaricca dsodo inajaro.

Ajijaro imapi Jesocristodsa jehe quinajaridenidsa dsodo inajaro. Motapa Romanodenicca nanajidso toquejenajari. Motapa tojicajari, mota tocassiejerajarideni ajijaro ima mittamanadsapa poccadeni jeheniji todacorani nanijine pohuadenidsa dsodo inajaro. Ia naqui Romanodenicca nanajidso iquejena-jeraraha ajijaro ima imittadsapi icca jeheniji todacorani nanijine pajirani.

Ajijaro imapi Djojine Huanodsa ahuato inanajarocca imittani. Jeso ccanibote nadsapa ajijaro dsamadsa tojaridsa-ponijinecca ima dsodo inajaro. Dsama jicanicca naqui ima dsodo inajaro.

Huano qqui tajaripa bica tanicca, oppina tanicca, jidsa tanicca, ijabojo nanicca. Pohua qqui tajari huapimapi jidsa taraha ima deni tojanicca cajini.

Ajijaro imadsapi Jesodsa: Edede Bedi, najari. Pohuadsa nama najaripa tahide jodiodeni poccadeni imasiri manaconi edede bedi Diodsa da da quiquinanapojari. Jesopa

huapimacca imasiri manaconi tojadsa pohuadsa: Edede Bedi, nanaja najari Dio.

Ajijaro imadsapi Diocca huadi Satanapa ajamani tojahi ahuato tajari. Jesona deni tojajari. Pohuana huapimacca tamine tojadsa memecca namicca dossede tojajari.

Jesocristojine Huanodsa jidapanacca ima ahuato, nidsa dsotodecca ima ahuato inanajaro

¹ Diona Jesocristodsa itedsejemacca ima ahuato inanapojaro. Manaco Jesocristopa pocca medsedenidsa ahuato inananiijine. Ajijaro ima iadsa ahuato inananiijine Jesocristo pocca dodosse memehuajicca dosse inaronadsapa ohuadsa huati tajari. Pohuajine qqui onajaro. Ohuapi Huano, Jesocristocca medse ojan. ² Aji huapima ohua qqui onajaropi pajissa huati onajaro. Aji dsodo onajaropi pajissa Dio Atti Jesocristojine ohuadsa ahuato inanajaro.

³ Ajijaro ima Diojine ahuato tajarocca madija huapima mittamanahijine hua hua najaripa huatidsehema madihitohui. Mittamanajarideni naco aji dsodo naniccassa inanamanajarodeni naco huatidsehema madimanahitohui. Diojine ahuato inanajaropi tohuajirajonani.

Huanopa Jesocristodsa quequeriquimana najari 7 najarodsa dsodo inajaro

⁴ Ohuapi Huano. Ajijaro occa imapi aji Asiahuajicca odsa panani 7 nanihuaji Jesocristo tahimaridsa tiqueriquimana najarodenidsa dsodo onajaro. Diopa madihi. Nadsama madipojari. Nidsa ccajonahitohui. Ccajonadsapa tiadenidsa ima bicani inanaridsana. Pocca jonehe inanaridsana, onajaro. Dio Pohua dosse dosse nanaja nahicca huihuittari tadsajanima Pohua Corime 7 quinaha domo huajarideni naco tiadenidsa ima bicani

inanaridsamanana. Poccadeni jonehe tiadenidsa inaridsamanana, onajaro. ⁵ Jesocristo naco tiadenidsa najarossa inaridsana, onajaro. Puhuapa Dio Atti nahato tadsa pajissara huati huati tajari. Puhuana tahide nahatonipojari. Puhuapa dsama huapimacca tamine deni tojjari. Huapimadsa dosse dosse najari. Jesocristo iadsa huati huana tajari. Imasiridsa imadiraha pohua emene toccajarojine icca imasiri inajicaridsajaro. ⁶ Puhujine pocca cacahuanijidsa iquejenajaro. Puhujine pocca Abi Diodsa idsepe ijijaro. Diodsa dada toqqimade, huahuati toqqimade iquejenajaro. Nadsapi Jesocristodsa ehetidse nana. ¡Puhuapa bica tahi, deni tojahi! Pocca nahatonaja huapima ecahuadsanaponijine pocca deni tojehe pajiranissa tajaro. Apaja pohuapa nama dsanapohuitohui, inana, onajaro. Pajissa nema nana.

⁷ ¡Ticattomama canaji!

Jesocristo meme essenima ccaronahi qqui tiquinahitohui. Madija huapima qqui toquinahitohui.

Aja Jesocristo pohua nanadsoqqededeni naco qqui toquinahitohui.

Dsama huapimacca madijapa pohuatohui oji oji quinahitohui.

Jehe, pajissa nema nana.

⁸ Ia Medsede Dio Attipa: —Ohuapi Dio Dacorabote. Tahidedsama omadipojaroa aji jicaqquni bacco onanito-hui —nade ia Medsede attipa. Puhuapa madihi. Nadsama madipojari. Nidsa ccajonahitohui.

Huanodsa Jesocristo ahuatojari

⁹ Ohuapi Huano timecotedeni ojani. Titedsejedeni Diocca cacahuehdsa iquejenajaro. Madija Dio Attidsa jiperaqquri najaripa ia totonajidso-baqquimana najari. Naraha Jesocristojinepi ima inahananijine ipajirani.

Ohuapi passo nocconidsa dsama huittidsacossani Patimodsa ohua inebomanadsapi pina toponi cocorodsa ohuedsajarossa najaro. Dio Atti maride ojaridsadsa, Jesocriso tahimari ohuaccora-ridsadsapi Pohuadsa jiper-aquiri najaridenijine todsepe ojararo. ¹⁰ Ia Medsedecca huada domingodsa Dio Corimecca dacorehe ohuadsa ahuatomadsa mohuini dacorehema ohuedehuaji omittajaro. Atti mohui pina jeihei mohui dacorajarissa nadsa omitajaro. ¹¹ Atti ajama najari: —Ajijaro huapima tiadsa nohue onajaropi papeodsa dsodo taji. Aji dsama Asiahuajicca Jesocristodsa quequeriquimana nahi 7 naridsajarodsa ima dosse tinaridsanijine. Odsa panani Epesohuaji, Esmirnahuaji, Peocamohuaji, Tiatirahuaji, Saradisiohuaji, Piradeopiahuaji, Laodiseahuaji dosse tinaridsaji —nade atti mohui tadsa. ¹² ¿Nejecoari atti? onadsa piti onahuajanidsa qqui onanaja jojororo pinine dsibehi tajari orocca 7 quinaha qqui onajari. ¹³ Qqui onanaja jojororo pinine cacahueri nahi nocconidsa pina madija bedissa naha hua canajari. Pocca etero dequerajaro amoridsa bacco tajaro. Pohua biji mete ssoosque dsibehi tajaro pina orossa najaro. ¹⁴ Tati conepi nopo tajaro. Pina edede bedi nopohui conessa, pina ssono tetepinicca ssirini nophonissa najaro. Pohua noccopa pina dsippo jororonissa najaro. ¹⁵ Pohua amori naqui dsibehi tajaro. Pina ccara tahicca onini bronze dsippo ppoconidsa tojadarijaro, dsotode jiti nadsa todsibehijarossa najaro. Pohua atti dacorajaro, pina passo dacorehema ssahaha canajarossa najaro. ¹⁶ Pohua dsepe nahatoniccadsa abadsico bedi 7 canaha cajijari. Pohua ajaridsapi jadsirecca massito cajadsirequimera najarossa najaro qquenajaro. Pano naco dsibehi tajari pina maji itetepidsa ssiejene dacorajarissa najari.

¹⁷ Qqui onadsapa pina ohuatiajarossa najaro. Pohua amorihuaji ohuedimadsa oponajaro. Naraha po-

hua dsepe nahatoniccadsa ohua bara nadsa huati tajari: —Ticappina-jeraji. Ohuapi tahidedsama omadipojaroa aji jicaqquni bacco onanitoahui —nade. ¹⁸ — Ohuapi camitta onani. Odsoqueporaha onahatonid-sapi omadi-dsanaponitoahui. Ohuapi pipico ocajini. Najaripa dsoqquemana-pojarideni corime cacahuabaqqu-hicca pipico —nade Jesocristo ohuadsa. ¹⁹ Nadsapa ohua cadossejari: —Aji huapima qqui tinajarocca dsodo taji. Aji jidapana tojaridsajaroocca dsodo, nidsa dsotode tojani-jinecca dsodo taji. ²⁰ Aja abadsico bedi 7 canaha odsepe nahatoniccadsa qqui tinajari, jojororo pinine orocca 7 naha qqui tinajaricca ima ahuatora taraha imapi ajima najaro: Aja abadsico bedi 7 canajaripa otahimaridsa quequeriquimana najari 7 najaro cacahuade toquejenajaridenicca ima. Aja jojororo pinine 7 najari naco otahimaridsa quequeriquimana najari 7 najaro —nade Jeso ohuadsa.

2

Odsa panani Epesocca Jesocristodsa quequeriquimana najaridenidsa Jesocristo pohua atti dosse inajaro

¹ Jesocristo ohuadsa huati dsanapojari: —Epeshuaji otahimaridsa quequeriquimana najari cacahuadedsa dsodo taji —nade. —Ohuapi odsepe nahatoniccadsa abadsico bedi 7 canaha ocajijaro. Jojororo pinine orocca 7 naha cacahueri naridsajari qquide naqui occuridsajaro, nahi taji, onajaro. ² Ticcadeni madie ohuadsa ahuato taridsajaro. Dio tiadeni tocadossebaqquijaridsa tidsepedeni ijimanadsapi dacoco tijiradsa tidsepedeni ijimanagero. Otahimaridsara disseraqquri tiquinajaro. Ticcadeni ima onihi naqui nahato onani. Najaropi tabaccorehe inanamanajarodeni tettajobaqqui-manajari. Madija mota maidsamanadsa attidenipa: “Iapi Jesocristocca dodosse

tabaqqi iquejenani” quinaraha poccadeni ima nat-tome tiquinadsapi tijinedeni poccadeni maidsehe ahua-to tinanamanajaro. ³ Otahimari tinebomananijine madija tiadeni tonajidso-baqquimanaraha tinebomanajerani. Ticcadeni ima occa marinajassa nanijine jahohoraqquri tiquinajaropaji.

⁴ —Naraha ticcadeni ima motapi jipera onani. Tahidepi ohuadsa tetideni huanacquiri nadsa ohuadsa tetidsemaneri naporaha dsotodepi ticcadeni huatidsehe ajimani tojani. ⁵ Tibodideni huatoma-manaji. Aji ohuadsa tetidsemanapojarocca ima tetideni ajimamana tejeraji. Tibodideni cacajiquimera-pomaji. Ohuadsa tetideni huanacquiri napomaji. Nema tiquinejeradsapi nanihuaji occadsa ticcadeni jojororo pinine odinihitohui. ⁶ Naraha ticcadeni ima onihipi bica tani. Nicolaitadenicca ima tabaccora taniccadsa jiperaqquri tiquinani. Ohua naqui Nicolaitadenicca imadsa jipera onani.

⁷ —Dio Corimepa otahimaridsa quequeriquimana najaridenidsa huati huati tajari. Aji huapima titiqueriquiridsa nanihuaji teribodeni ticajimanadsapi Pohua Atti timittamananissa taji, onajaro. Aji occa dacorehema timadimanadsa ohuadsa jehe tiquinajaro tinebomanajeradsapi nidsa Diocca dsama bicanihuaji ahua bono camittehecca tijipamananijine tiadenidsa da onaridsahitohui —nade Jeso.

Odsa panani Esmirnacca Jesocristodsa quequeriquimana najaridenidsa Jesocristo pohua atti dosse inajaro

⁸ Jesocristo ohuadsa huati dsanapojari: —Esmirnahuari otahimaridsa quequeriquimana najari cacahuadedsa dsodo taji —nade. —Ohuapi tahidedsama omadipojaro aji jicaqquni bacco onanitohui. Odsocqueraha onahatonidsapi omadijaro. ⁹ Aji ohuapi nemanehenahato onani. Najidsohuedsa timadimanani nahato onani.

Todsepetaji ticappiramanene timadimanajaro naqui nahato onani. Naraha pajissa tiadenipi Diocca daniji bicabote onihi onihi nehe ticajimanani. Tiadenidsa jiperacquiri najarideni tiadeni tototamasso-baqqumana najari nahato onani. Najarideni attidenipa: “Iapi jodiideni, Diocca madija iquejenajaro” quiquinanaraha najaropi pajissa jerani. Ima pajissapi pohuadenipa Satanacca medse toquejenajari.¹⁰ Nidsa otahimari acconi ocasserani temanadsapi ticappinamana tejerana. Satana-jine tiadeni mota pamahapa toponi cocorodsa toquejenahitohui. Nama nahijinepa tiadeni huapima tiadeni nattome tabaqquihitohui. Huada 10 nehe pohuajine ocasserani temanaraha otahimaripi tinebomana tejeraji. Disseraquiri tidsanapomanaji. Otahimari tinebomanajeradsa tidsoqqumanani bacco tiquinadsapi tiadenidsa occa camittehe jiquejeranicca da onanitohui.

¹¹ —Dio Corimepa otahimaridsa quequeriqqumana najaridenidsa huati huati tajari. Aji huapima titiqueriqquiridsa nanihuaji teribodeni ticajimanadsapi Pohua Atti timittamananissa taji, onajaro. Aji occa dacorehema timadimanadsa ohuadsa jehe tiquinajaro tinebomana-jeradsapi tidsoqqumanaraha dsoqquehe dsotodeccapi tinahanamana-jeranitohui, onajaro —nade Jeso.

Odsa panani Peocamocca Jesocristodsa quequeriqqumana najaridenidsa Jesocristo pohua atti dosse inajaro

¹² Jesocristo ohuadsa huati dsanapojari: — Peocamohuaji otahimaridsa quequeriqqumana najari cacahuadedsa dsodo taji —nade. —Ohuapi jadsirecca massito cajadsireqqumera najaro ocajini.¹³ Aji ohuapi ticcadeni madie nemanene nahato onani. Timadimananihuajipi Satanacca ima dacoraraha ohua onipi tinebomana-jerajaro. Ohuadsa jehe nahissa tajari

oni Antipas tinoridenidsa inanadsoqqe-manaraha ohuadsa jehe tiquinajaropi tinebomana-jerani. Nahi tiadenihuaajipa Satana dosse dosse naraha ohua tinebomana-jerani.

¹⁴ —Naraha ticcadeni ima motapi jipera onani. Tiadenihuaaji madija motapa maittaccadsama madijari Baramicca marinaja nebomana-jarahi. Aja Baramipa Isaraerideni imasiri inanamananijine dsama Moabacca tamine Baraca inahattajari. Pocca marinajapi ajima napojaro: Siba nahatonidsa da tahicca bani Isaraerideni jipamanahijine oppinera tani. Huananehe inanamananijine naqui oppinera tani, najari.

¹⁵ —Nahidsa naco madija mota Nicolaitadenicca marinaja nebomanahijine jiperaquuri najari. ¹⁶ Tibodideni tecajiqquimeraji, najaro ima pamehe tiadenidsa nohueranijine. Ticcadeni ima tecajiqquimera-jeradsapi tiadenihuaaji occanitohui. Baramicca, Nicolaitacca marinaja cajimanajarideni ocahadibaqquihitohui. Ohuajaridsa ohuatti qquenajaro pina jadsirecca massitossa najaro pohuadenidsa ssonarinitohui.

¹⁷ —Dio Corimepa otahimaridsa quequeriqquimana najaridenidsa huati huati tajari. Aji huapima titiqueriqquiridsa nanihuaji teribodeni ticajimanadsapi Pohua Atti timittamananissa taji, onajaro. Aji occa dacorehema timadimanadsa ohuadsa jehe tiquinajaro tinebomana-jeradsapi tiadenidsa pan oni mana memehuaji tonajimahicca tijipamananijine da onaridsahitohui. Siba noponi naqui tiadenidsa da onaridsanitohui. Najaro sibadsapi tiadeni oni dsati dsodo nani cajiridsani. Najaro tiadeni onipi tiadenira nahatoquuri tiquinajaro —nade Jeso.

Odsa panani Tiatiracca Jesocristodsa quequeriqquimana najaridenidsa Jesocristo pohua atti dosse inajaro

¹⁸ Jesocristo ohuadsa huati dsanapojari: —Tiatirahuaji otahimaridsa quequeriquimana najari cacahuadedsa dsodo taji —nade. —Ohuapi Dio Bedi ojani. Onoccopi pina dsippo jororonissa najaro. Ohuamori naqui dsibehi tajaro. Pina ccarara onini bronco jiti nani todsibehijarossa najaro. ¹⁹ Ima huapima tinanamanajaro naqui nahato onani. Otohui tetideni huanacquiri nadsa ohuadsa tetid-semanani nahato onani. Ticcadeni jeheniji dacorani nahato onani. Ohuadsa tidsepedeni ihijimana najaro. Najo taniccdsa iboraquiri tiquinani nahato onani. Jidapapi denima nema tidsanapomanani naqui nahato onani.

²⁰ —Naraha ticcadeni ima motapi jipera onani. Najaropi amoneje Jesabeocca ima. Poni attinipi: “Ohuapi Dio Atti cacomerabote” naraha maidsajaro. Ponicca marinajajine occa madija huananeheda toquejenaridsajari. Ponijine siba nahatonidsa da tahicca bani naco jijipamana najari. ²¹ Ohuapi poni bodini cacajiquimeranijine tohuini omadi omadi dsanaporaha bodini cacajiquimeranijinepi jipera tajaro. Ponicca huananehe nebonijine jipera tajaro. ²²⁻²³ Naraha jidapapi ojine coma tehe porinitohui. Ponicca ejedeni naco onajicahitohui. Nidsa poni ajadedeni naco bodideni cacajiquimera-jaradsa, poccadeni imasiri nebomana-jaradsapa pohuadeni naco comacquiri nadsa ocasserani ahuamanahitohui. Nadsama otahimaridsa quequeriquimana najari huapima bodideni huatomamanadsapa occa ima nahatoquiri nahijine. Ohuapi madija attideni nahato, bodidenicca ima nahato onajaro. Imasiri tinanamanajaro manaconi tiadenidsa onananitohui.

²⁴ —Naraha Tiatirahuajicca tiadeni mota aji Jesabeocca marinajadsa tiquejena-jeradsapi, aja “Satanacca marinajadeni tojanicca ahuatora tani” quiquinanajaridsa tiquejena-jeradsa naqui tiadenidsa ima oppina

tanicca huati onejeraraha ima ojariena huati onajaro.
²⁵ Ticcadeni ima bicani tecahuamana-dsanapona, occanipomanihuaji bacco tiquinanijine. ²⁶ Aji occa dacorehema timadimanadsa, ohuadsa jehe tiquinajaro tinebomana-jeradsa naqui, aji ohua jipa onanicca tidsepedeni ijimanadsapi nema tidsanapomanajaroa occanini bacco tiquinanitohui. Nadsapi dsama onihi onihi naridsajarocca madija dossede tiquejenanijine tiadenidsa dacorehe onananitohui. ²⁷ Maittaccadsama occa Abipa ohuadsa: “Dsama nemanehedsa madiridsamanajaridenicca tamine tijanitohui. Pina tamine dacorabote pocca dsodsojo ccanajabotedsa dsipa idadsa bararijarossa tinanabaqquihitohui” napode ohuadsa. ²⁸ Naraha cacahuehe najarossa najaro tiadenidsa naqui onanaridsadsapi dsama huapima tecahuaridsa-mananitohui. Tiadenidsa ima onihi bica tanicca naqui onanaridsanitohui. Madija huapima ticcadeni deni tojehe qqui toquinahitohui. Pina ssiajajonanicca abadsico bedi ssiejene dacorajarissa tiquinanitohui.

²⁹ —Dio Corimepa otahimaridsa quequeriqquimana najaridenidsa huati huati tajari. Aji huapima titi-queriqquiridsa nanihuaji teribodeni ticajimanadsapi Pohua Atti timittamananissa taji —nade Jeso.

3

Odsa panani Saradisiocca Jesocristodsa quequeriqquimana najaridenidsa Jesocristo pohua atti dosse inajaro

¹ Jesocristo ohuadsa huati dsanapojari: — Saradisiouhaji otahimaridsa quequeriqquimana najari cacahuadedsa dsodo taji —nade. —Aji ohuapi Dio Corime 7 naha ocaji, abadsico bedi 7 canaha ocaji najaro. Ohuatti tiadenidsa ajima onajaro: Ticcadeni ima huapima

nahato onani. Madija ohuahadeni ticcadeni madie qqui toquinadsa attidenipa: “Jesocristo tahimaridsa huahuatidsemana nahi” quinaraha ohuapi pajissa nahato onani: Ohuadsa tetideni ajimamanabote nani. Pina tecotajarossa najaro. ² ¡Jari, tinoccodeni ssire-re napomaji! Titiqueriqui nanicca ima jicabote nani. Tidacoramanani napomaji. Ticcadeni madiecca ima nahato onani: Occa Abi Diodsa tidsepedeni ijjaropi tijinedeni toccanissa tejerani.

³ —Nadsama tiadenipi tibodideni huatoma-mananissa taji. Aji occa marinaja tiadeni mari tocanabaquipojarissa tinanamanapomaji. Ticcadeni ima tecajiquimera-manapomadsa Diodsa tiquejenanipomaji. Nema tiquinejeradsapi tiadeni onajidsobaquinitohui. Pina tetideni ajimama canaraha tiadenidsa bobotide bacco dsimajarissa onanitohui, onajaro.

⁴ —Naraha tiadeni Saradisiodsa titiqueriqui najaro motadeni ajjaro dsamacca imasiridsa toquejenanipomajarahi. Poccadeni imapi pina poccadeni etero tohobajerajarossa najaro. Nidsa ohuadsa madimanadsapa pohuadenidsa etero noponi da onaridsanitohui. Bicaqquri najarijine ohuadsa etero noponidsa jahiridsahitohui. ⁵ Occa dacorehema timadimanadsa imasiridsa deni tiquejenadsapi nidsa dsotode etero noponi tedsaridsamananitohui. Diocca papeo camittehe cajimana-dsanapohuijineccadsa tiadeni oni dsodo nani sse onaridsa-geranitohui. Nidsa occa Abi pocca dodosse tabaqquideni tedseje baccodenihuaji tidomo huadsa: “Ajajaridenipa occa madija” onanitohui.

⁶ —Dio Corimepa otahimaridsa quequeriquimana najaridenidsa huati huati tajari. Aji huapima titiqueriquiridsa nanihuaji teribodeni ticajimanadsapi Pohua Atti timittamananissa taji —nade Jeso.

Odsa panani Piradeopiacca Jesocristodsa quequeriquimana najaridenidsa Jesocristo pohua atti dosse inajaro

⁷ Jesocristo ohuadsa huati dsanapojari: — Piradeopiahuaji otahimaridsa quequeriquimana najari cacahuadedsa dsodo taji —nade. —Ohuapi pajissa. Obodi ssiaja, huire tajaro. Maittaccadsamacca tamine Dabicca pipico ocajini. Najari pipicodsa Jerosare dsaticca noccobiji ohuacahuajaro. Madija Diodsa memehuaaji madimanahijine jehe onadsapi jai tojedsimahitohui. Jehe onejeradsapi jai tojedsima-jarahitohui. ⁸ Ohuapi aji huapima tidsepedeni ijiridsamanajarocca nahato onani. Nidsa Dio madihihuaji tiadenidsa: “Jai tijedsimaji” onanitohui. Nanihuaicca noccobiji tiadenidsapi tohuabani. Madija ohuaha ecossanijine ssamo tani. Tiadenipi dacoco tijira-jeraraha ohuattidsa iboraquuri tiquinani. Madijajine nanajidso tiquejenadsa naqui ohua oni tinebomana-jerani.

⁹ —Titohuideni ohuati huana tani. Nidsa mamaiadsadeni ojine tibaccodenihuaji pohuadeni pitodsa jassi tahi-tohui. Nama onabaquidsapa tiadenidsa ohuati huana tani pohuadenidsa ahuato tanitohui. Najari jodiodeni mota attidenipa: “Iapi jodiodeni, Diocca madija iquejenajaro” quiquinanaraha pajissapa Diocca huadi Satanacca medse toquejenajari.

¹⁰ —Tiadenidsa huati onapojaropi: “Ocasserani temanaraha mohuaradsa tinahanamanana” onapode. Nadsama ohuatti tecahuamananissa tadsa aja dsama huapimacca madija ima ocassera taniccadsa nattome onabaquidsapa tiadeni dsori onabaquinitohui. ¹¹ Occanibote nani. Ticcadeni ima bicanipi tecahuamananissa taji. Ohuadsa disseraquuri tiquinadsapi Diocca daniji bicani ticajimananitohui.

Paji, ticcadeni jeheniji madija inassamomanarana. Diocca daniji pohuadenijine dsori ticanirerana. ¹² Occa dacorehema timadimanadsa, imasiridsa deni tiquejenadsapi nidsa dsotode occa Abi Dio madihihuaji timadimananitohui. Ojine tiadenipi pina memehuaajicca Pohuadsa dada toqquimacca odsa pininissa tiquinanijine. Nanidsapi jai tijena-geranitohui. Occa Abi Dio oni tiadenidsa dsodo, Pohua madihihuajicca odsa panani onini naqui dsodo onaridsanitohui. Najaro odsa panani oninipi Jerosare dsati. Najaropi occa Abi Diojine memehuaajicca namihuaji bacco naronanitohui. Ohua oni dsati naqui tiadenidsa dsodo onaridsanitohui.

¹³ —Dio Corimepa otahimaridsa quequeriqquimana najaridenidsa huati huati tajari. Aji huapima titi-queriqquiridsa nanihuaji teribodeni ticajimanadsapi Pohua Atti timittamananissa taji —nade Jeso.

Odsa panani Laodiseacca Jesocristodsa quequeriqquimana najaridenidsa Jesocristo pohua atti dosse injaro

¹⁴ Jesocristo ohuadsa huati dsanapojari: —Laodiseahuaji otahimaridsa quequeriqquimana najari cacahuadedsa dsodo taji —nade. —Ohuapi pajissa. Aji huati huati onajaropi pajissa qqui onajaro imara huati huati ohonanajaro. Huapima Abi Dio inahatoridsajaripa ojine tojaridsajari. Nadsama ohuatti tiadenidsa ajima onajaro: ¹⁵ Ticcadeni ima huapima tinanamanajaro nahato onani. Ohuadsa jehe tiquinajaropi tinebomanajeraraha ohuadsa tetidsemana-gerani naqui nahato onani. Jaho, ohuadsara tetidsemaneri naccaraho. Tiadenipi pina bani ppejene ppocora-jarajarissa, pina passo nahui tejerajarossa tiquinajaro. Nema naniccapi dse nanijine ocassera tajaro. ¹⁶ Pina passo nahui tejerajarossa tiquinajaropi tiadeni capiri onanitohui. Ticcadeni

ima ocassera tadsapi tiadeni ohuattajo-baqqunitohui.
¹⁷ Naraha tettidenipi: “Iapi ima bicani ssequiri inani. Ijine icca ima toccanissa tani. Icappira-gerani” titiquina naraha tibodideni huatonissa tejerani. Ima pajissapi ssamoqquiri tiquinani. Ticcadeni imapi bica tejerani. Tohuati nahanaqquiri tiquinani. Ticappiramananissa tajaro. Pina madija nocco sirissa tiquinajaro. Pina etero jiraha ccorojedeni madimanajarissa tiquinajaro.

¹⁸ —Nadsapi tibodideni acco ocamabaqquinijine tiadenidsa huati onana: Aji ohua ocajijarocca mitta tiquinaji. Nadsana ima bicani ticajimananijine. Najaroa ima bicanipi pina oro dsippo ppocoradsa todsibehidsapi huatini ccara tanicassa najaro. Aji ticcorojedeni noppineni ticappinamanadsapi etero noponi ocajijaro mitta tiquinaji. Najaro tedsamanadsapi ticcorojedeni ahuato tejeranijine. Aja tonoccocca jemedsi ocajijaro naco mitta tiquinajo, tinoccodeni sse tiquinadsapi tinoccodeni ssire taridsanijine, onajaro.

¹⁹ —Ohuapi madijadsa ohuati huana tadsa imasiri inanamanadsapi ohuatti dacorehema pohuadenidsa: “Nema tiquinejeraji” ohonanajaro. Poccadeni ima tobicanijine naqui mari mari onajaro. Ohuadsara tetidsemanaji. Ohuadsara disseraqquri tiquinaji. Tibodideni cacajiquimeradsa Diodsa tiquejenanipomaji.

²⁰ Ohuapi noccobijidsa huahua onajaro. Madija ohuatti mittadsa noccobiji icatabojidsadsapi pohuadsa oqquedsimanitohui. Oqquedsimadsapi pohua tedseje ijipanitohui. Pohua naco ohuadsama jipahitohui.

²¹ Ohuapi imasiridsa deni ojajarojine occa Abi dosse dosse nahihuaji ohuittarjaro. Tiadeni naqui imasiridsa deni tiquejenadsapi nidsa dsotode ohua dosse dosse onanihuaji tiadenidsa: “Jassi tinariji” onanitohui.

²² —Dio Corimepa otahimaridsa quequeriqquimana

najaridenidsa huati huati tajari. Aji huapima titi-queriquirrelidsa nanihuaji teribodeni ticajimanadsapi Pohua Atti timittamananissa taji —nade Jeso.

4

Memehuaji Diodsa huatidsemanajari

¹ Aja Jesocristo pohuadsa quequeriquimana najari-denidsa ima huati tahi jicani nattinipi qqui onaneje memehuaji pina noccobiji tohuabajarossa nehe qqui onajaro. Atti naco dacorajari pina jejei mohui omittapojarossa najaro omittapomajaro. Nadsapa ohuadsa huati tajari: —Ahuaji ticcamacossaji. Jidacca qqui tinajaro nattini dsotode tojanijinecca ima tiadsa nohue onana —nade.

² Nadsapi Dio Corimecca nahatohue ohuadsa ssonaridsa qqui onaneje meme Dio dsamarihuaji deni tojahicca huihuittari bicabote qqui ocanajaro. Najaro huihuittaridsa huittari canahi qqui onajari. ³ Aja huittarijaripa ohuadsa ahuato tajari. Pohuapa dsibehi tajari. Dsi-behine pina siba huatini ccara tanicca dsibehinissa najari. Pina diamante dsibehinissa, pina robi dsibehinissa najari. Pohua huittarihi tetepidsa naqui meme janoni porimacossani qqui onajaro. Janonipi pina siba esemeraoda dsibehinissa najaro. ⁴ Pohua huittarihihuaji qqui onadsapi cacahuadedeni 24 quinaha jassi tariridsajari. Dodossededenicca huihuittari bicaquiri najarodsa jassi nahuajanijari. Poccadeni etero nopoquiri najaro. Pohuadeni tatidsa tamine taticca oro nahatoni huittariridsajaro. ⁵ Pohua huittarihidsa ssissiede ssiehe canajaro, ttottorode ttororo canajaro. Mohuini onihi naqui que-naridsajaro. Pocca huihuittari bicabote tadsajanima jororo 7 naha jororo canaridsajari. Najari jororropa Dio Corime ahuatoridsajari. ⁶ Nani pocca huihuittari bicabote

tadsajanimapi pina coridsa imenissa naraha ccara tajaro. Tocassiejequimera najaro, pina siba cristaossa najaro.

Nahi Pohua huittarihi inoridsa naco camittaquiri najarideni 4 quinaha huahueri nahuajanijari. Pohua baccouhuaji, pohua idehuaji, pohua ppari nahatonihuaji, pohua ppari ssamohuaji naridsamanajari. Camittehe cajimanageri assiredenidsapi noccodeni ijiridsajaro. Pohnadeni tedsejema qquide nahatoquiri, pohnadeni nattihuaji qquide nahatoquiri najari. ⁷ Najarideni ojaría tahidecapa pina dsomaji. Ohuahapa pina bohui. Ohuahapa pina madija pano. Ohuahapa pina ssibiri imehibote meme toccajarissa najari. ⁸ Aja 4 quinajaridenipa eppedeni 6 naha cajiridsamanajari. Assiredenidsa noccodeni ijiridsajaro. Eppedeni bodihuaji naqui noccodeni ijiridsajaro. Nadsama pohnadenipa ssiajama jijiri, dsomema jijiri dsadsanapomana najari. Pohnadeni attipa:

—Ia Medsede Diopa bicabote. Bodi ssiaja tahi, huire tahi ojarihi.

Pohna dacorabote ojarihi.

Pohna nadsama madipojari. Madhipaja nahi. Nidsa ccajonahitohui —quiquinanageri.

⁹ Aja deni tojahicca huihuittari bicabotedsa huittari canajaripa madidsanapojari. Najaridsa camittehe cajimanageridenipa huati toquinajari: —Ticca nahatohue deni tojani, tiadsa etidsejaro, iadsa tijine bica tani, inajaro —quiquinanageri. ¹⁰ Najaro huati huati totoquina nadsapa cacahuadedeni 24 quinajari aja Madidsanapojari tedsejema pohnadeni pitodsa jassi tadsa Pohnadsa huatidsemanajari. Pohnadsa huatidsemanadsa pohnadeni taticca oro nahatoni pohua huittarihi tedsejema hua inacquimanajari. Nadsapa attideni ajama quinajari:

¹¹ —Ia Medsede icca Dio, Tiadsa etidseni bica tani.

Tiana dsama huapimadsa cajiridsajari pa tinahatoridsajari.

Tia tohuini tadsa tijine huapima nahatoridsajari.

Najarojine madija huapima tiadsa: “Bica tinani, deni tijani” quinahijine bica tani, inajaro –quinade.

5

Edede Bedi papeo pico naqquni idijaro

¹ Nadsapa deni tojahicca huihuittari bicabotedsa huit-tari canahihuaji qqui onaneje pohua dsepe nahatonic-cadsa papeo pico naqquni dsojo tojidsajari. Bodihuaji dsodo, huapihuaji dsodo najaro. Nepi tamaroni 7 nehe cajijaro. ² Diocca dodosse dacorabote ojaría qqui onajari. Pohua atti mohui tadsa huati tajari: —¿Nejecojarina ima jijirade bicabote deni tojajari? Najarina papeo pico naqquni nepi nacossaridsani ssoja ijidsadsa inahabanijine bica tahi —nahi omittade. ³ Naraha aja memehuaajicca, namihuajicca, nami bodihuajicca naco papeo pico naqquni inahabamananijine huapima pajiramanaja cama-jarahi. Bodicca ima qqui quinanijine naqui pajiramanaja cama-jarahi. ⁴ Nadsapi oji oji onade. Jaho, madija ima jijirade bicabote deni tojajari papeo pico naqquni inahabanijine nohuerahi. Qquide naco pajiramanaja cama-jarahi, onade. ⁵ Naraha nahihuaji cacahuadedeni jassi nahujanijari 24 quinajari ojaría ohuadsa huati tajari: —Oji tejeraji, aja Isaraeri bedi Joda potemahi dacorehe cajijari pina dsomajissa najari. Najaripa Isaraeridenicca tamine Dabi Potemahi. Pohanana dsoqquehedsa deni tojajari. Papeo pico naqquni inahabanijine pajirahi. Pohanana nepi nacossanicca 7 nehe ssoja ijidsaridsanijine bica tahi —nade ohuadsa. ⁶ Nadsapa

deni tojahicca huihuittari bicabotedsa huittari canahihuaji qqui onanaja Edede Bedi Jeso pina inanadsoque-manapojarissa naraha hua canajari. Pohnapa camittehe cajimanajarideni 4 quinajari, cacahuade 24 quinajari domodeni huahi nocconidsa huajari. Aja ori 7, nocco 7 najaripa Dio Corime 7 naha dsama huapimadsa qquide jahiridsahijine Dio dosse inabaqqijari. ⁷ Nadsapa Edede Bedipa papeo pico naqquni idinijine deni tojahicca huihuittari bicabotehuaji toccajari. Nahidsa huittarijari dsepe nahatoniccadsa papeo dsojo ijidsajaro idijaro. ⁸ Najaro papeo ididsapi camittehe cajimanajarideni 4 quinajari, cacahuadedeni 24 quinajari tedseje Edede Bedi pohua tocattahihuaji pohuadeni pitodsa jassi tajari. Pohnadenipa titire oni arpa cajimanajari. Pohnuadeni dsepedsa tasao oro nahatoni bodidsa nahatohui majo bicabote caji naha dsojo dsojo tojidsamanerijari. Majo bicabote tohuessidsa jami-mi canajaripa Diocca madija Pohnuadsa huati huati totoquina nahicca ima. ⁹ Pohnuadenipa ajie dsati jiri icanamanadsapi ajama quinajari:

—Tiana bicabote deni tijani ojari tajaro. Papeo pico naqquni tidijaro bica tani.

Nepi tamaroni 7 nehe cajiraha ssoja tijidsanijine bica tani.

Tiana tia inanadsoque-manadsa temene toccajarodsa Diodsa toquejenahijine mitta tinabaqqijaride.

Aja madija dsama onihini onihidsa madiridsamanajarideni mota, tohuatti onihini onihini cajiridsamanajarideni mota, huapideni onihini onihini cajiridsamanajarideni mota tijine Diodsa toquejenaridsajari.

¹⁰ Tijinepi Abi Diocca cacahuehedsa tamine toquejenaridsajari.

Tijinea Abi Diodsa dsepedeni ihijimana najari. Pohnuadsa huahuati toquimade toquejena, dada toquimade toquejena najari. Pohnuadsa jiri jiri quiquinanajaripaja.

Aji namihuaji madimanajarideni huapima dossede toquejenaridsahitohui —quinade, jiri jiri quinadsa.

¹¹ Nadsapi qqui onaneje deni tojahicca huihuittari bicabote cahittarinihuaji Diocca dodosse tabaqqi memehuajicca huapima attideni omittajaro. Nahi huihuittari cahittarinihuajipi camittehe cajimanajarideni domo huahuajani, cacahuadedeni naco domo huahuajani nahi idedenihuaji Diocca dodosse tabaqqi qqui onabaqqiraha siba tahi. ¹² Najaridenipa jiri jiri quinadsa attideni mohui taha ajama quinajari:

—Edede Bedi dsoqquepojaripa deni tojajari.

Pohnuana huapimadsa dosse dosse nahi pajirahi, bica tahi. Dsama huapimacca biquehe pohnuadsa tojanijine bica tani. Pohnuana bodi nahato tahi ojari nahi.

Pocca dacorehe deni tojani bica tani.

Huapima attidenipa: “Tiana icca Tamine deni tojahicca. Ticca deni tojehe nema dsanapona” quinana, inajaro.

Pohnuadsa etidsedsa: Tiana bica tinani, deni tijani, inanijine bica tani —quinade.

¹³ Nadsapa Diocca nahatonaja huapima attideni omittajaro. Memehuajicca, namihuajicca, nami bodihuajicca, passo imenicca jiri jiri quinadsa ajama quinajari:

—Deni tojahicca huihuittari bicabotedsa huittari canajaridsa,

Edede Bedi pohnuadsa naco etidsejaro.

Pohnuadenidsa etidsedsa: Tiadenina icca Tamine deni tiquejenanicca.

Ticcadeni deni tojehe nema dsanapona, inajaro.

Ticcadeni dacorehe deni tojani, bica tani, inajaro.

Najaro ima bicani nemanehipi tiadenidsa nema dsanaponitohui, inajaro –quinade.

¹⁴ Nadsapa camittehe cajimanajarideni attidenipa: — ¡Pajissa nema nana! —quinade. Nadsapa cacahuade 24 quinajarideni pohuadeni pitodsa jassi tadsa deni to-jahicca huihuittari bicabotedsa huittari canajaridsa hu-atidsemanajari. Edede Bedidsa naco huatidsemanajari.

6

Papeo pico naqquni nepi tamaroni 7 najaro

¹ Ocattoma cananeje papeo pico naqquni nepi tamaroni 7 najaro tahidecca Edede Bedi ssoja ijidsani qqui onade. Nadsapa camittehe cajimanajarideni 4 quinajari ojaría jadsirema huahua nahi omittade. Pohua atti mohuini pina ttottorode mohuinissa nadsa: —Nija, ahuaji ticcajonaji —najari. ² Nadsapa bojo nopohui qqenahi qqui onajari. Najari idedsa huittarijaripa ssissite caji nade. Nadsapa tamine taticca pohuadsa da quinadsa toccajari, jadsiredsa deni tojaridsahijine.

³ Nadsapa papeo nepi tamaroni dsotodecca Edede Bedi ssoja ijidsajaro. Nanaja camittehe cajimanajarideni ohuaha huahua nahi omittade: —Nija, ahuaji ticcajonaji —najari. ⁴ Nadsapa bojo ohuaha macco tajari qqenajari. Najari bojo idedsa huittarijaridsa dacorehe da inajaro, dsama huapimadsa jonehe inajicaridsanijine. Pohuajine madija jadsire inanamanadsa ahuaji tojica, ahuaji tojica naridsamanahijine. Pohuadsa jadsirejine massito imenibote naqui da icanade.

⁵ Nadsapa papeo nepi tamaroni onihi 3'cca Edede Bedi ssoja ijidsajaro. Nanaja camittehe cajimanajarideni ohuaha huahua nahi omittade: —Nija, ahuaji ticcajonaji —najari. Nanaja bojo sohuehi qqenahi qqui onajari. Najari bojodsa huittarijaripa ccanajani nanattome cajide.

⁶ Camittehe cajimanajarideni domo huahi nocconidsa tohuatti mohuini omittajaropi ajima najaro: —Huada ojarinicca tarabaidsa manaconipi aroso jidsadsa trigo kilo ojaria pajirahitohui. Najarossa najaro huada ojarinicca tarabaidsa manaconipi aroso jidsadsa cebada kilo 3 naha pajirahitohui. Naraha ahua bono oribo oquine, uva ppejene naco huati ccara tadsapa pohuama sso tiquina tajarana —nade.

⁷ Nadsapa papeo nepi tamaroni onihi 4'cca Edede Bedi ssoja ijidsajaro. Nanaja camittehe cajimanajarideni ohuaha huahua nahi omittade: —Nija, ahuaaji ticcajonaji —najari. ⁸ Nanaja bojo huessehi qqenahi qqui onajari. Idedsa huittarijari onipa Dsoqqeque. Pohua nattihuaji ohuaha ccajonajaripa dsoqquemana-pojarideni corime cacahuade. Najarideni pamahadsa dacorehe da quina-jaro. Madija dsama nemanehedsa madimanajarideni mota inajidso-baqquimanahijine. (Najari mota caria at-tidsapi: cuarta parte, quinajari.) Jicahijinepa jadsiredsa tojica, pemidsa tojica, dsamacomadsa tojica, bani huadi tajarijine tojica nahitohui.

⁹ Nadsapa papeo nepi tamaroni onihi 5'cca Edede Bedi ssoja ijidsajaro. Nanaja Diodsa da tahijinecca huahuanari dopanidsa jicapojarari corimedeni qqui onabaqquide. Najaridenipa Dio Attidsa disseraqquri najari, aja Jesocristo tahimari huati huati nanaridsamana najarijine tojicajari. ¹⁰ Nadsapa attideni mohui tadsa huati toquinajari: —Ia Medsede Dio, Tiana deni tijani. Tibodipi ssaja, huire tani. Tia huati tinadsapi Tetti pajiranissa tinananitohui. ¿Nejecoma nadsa namihuaji madiridsa-manajaridenicca ima ticattemanijine? ¿Nejecoma nadsa emene toccajaro manaconi ia nanadsoqquededeni tinajidsobaqquihijine? —quinade. ¹¹ Nadsapa etero noponi huedsamanahijine pohuadenidsa da inaridsajaro. Pohua Attipa: —Jassi

tiquinaccaji. Timecotedeni pina tiadenissa quinajari Jesocristocca dossenijidsa dsepedeni ijimanaccajari. Nidsa pina tiadeni tijicapojarossa quinacchahitohui. Najarideni-tohui badsira tehe timadimanaccaji –nade Dio.

¹² Nadsapa papeo nepi tamaroni onihi 6'cca Edede Bedi ssoja ijidsajaro. Ocattoma cananeje dsama nemanehe dsadsa najaro. Majipa todsidsijari. Pina etero sohueni madija dsoqquehitohui oji quinadsa huedsamanajarissa najaro. Abadsico naco tocamaccojari, pina tohuemenessa canade. ¹³ Memehujajicca abadsico bedi naco namihuaji catojaridsajari. Pina ahua iquiera bono biridsati jojode dadorabotejine catojaridsajarissa nade. ¹⁴ Meme naqui pina papeo pico-co-co naquijarossa nadsa amossi nade. Ssono imeni huapima naqui pajimaranidsana tojaridsajaro. Passo imeni nocconidsa dsama huihuittidsacossari najaro naqui pajimaranidsana tojaridsade.

¹⁵ Nadsapa dsama huapimacca taminedeni, dsama cacahuadedeni, soldado dossededeni, huapimapa ssonohujajicca siba odinihuaji pohuadeni tonajimaridsamana, ssonohujajicca siba imeni caji tanihuaji naco pohuadeni tonajimaridsamana nade. Aja todsepetaji ssequiri najarideni, deni toquejenajarideni huapima naco nama quinade. Aja madijacca dodosse toquejenajarideni, madijacca dodosse toquejenajarideni huapima naco ssonohujajicca pohuadeni tonajimaridsamanade. ¹⁶ Cappinamanadsa attidenipa: –¡Ssono, siba iadsa cojo nariccarah! Bodi iquejenadsapi deni tojahicca huihuittari bicabotedsa huittari canajari ia qqui tabaqqi-jarahijine. Aja Edede Bedicca najidsohue oppinabotedsa ahuatoraqqiri inanijine. ¹⁷ Jidapanana Edede Bedi Jeso pohua Imehi tedseje poccadeni najidsohue imeni tojanijinecca huada bacco tani. Najaro najidsohuepi issiajanijine ipajira-gerani –quinade.

7

Isaraeri bedi 12 quinajarideni potemahi Dio inajanoridsajari

¹ Najaro jicadsapi Diocca dodosse tabaqqui 4 quinaha nami jicaqquinihuaji huahueri naridsahi qqui onabaqquide. Ohuahapa maji ccajonahihuaji hua, ohuahapa maji toccahihuaji hua, ohuahapa arobenihuaji hua, ohuahapa arobeni onihihuaji hua naridsamanade. Najaridenipa jojode 4 nehe ecossamanajaro, namidsa jappo-ppo canaridsa-jeranijine. Passo imeni naqui jene torani nanijine, ahua eppe naco jene torahi nahijine jojode joma inanamanajaro. ² Pohnadenipa dacorehe cajimanajari, nami, passo inajidsoridsa-mananijine. Nadsapa Diocca dodosse ohuaha maji ccajonahihuaji ccajonahi qqui onajari. Najaripa Dio Camittehe cajjaricca nanajano dsojo najonajari. Nadsapa Diocca dodosse tabaqqui 4 quinaha huahueri nahuajanjaridenidsa jadsirema huahua nade. ³ Pohua atti ajama najari: — Aji nami, passo, ahua tinajidsomana-jeraccaji. Nidsa icca Diocca medsedeni assaridenidsa najanoridsaccana —nade.

⁴ Nadsapa madija najanoridsamanahi onideni omittajaro: 144 mil (144,000) quinade. Najaridenipa Isaraeri pohua potemahi. Pocca ejedeni 12 quinajaridenicca madija. (Caria attidsapi: 12 tribus, quinajari.) ⁵⁻⁸ Isaraeri bedi potemahideni najanoridsamanahipa ajama quinajari:

Joda potemahi 12 mil (12,000),
 Robano potemahi 12 mil,
 Cado potemahi 12 mil,
 Asera potemahi 12 mil,
 Netari potemahi 12 mil,
 Manase potemahi 12 mil,
 Simeo potemahi 12 mil,

Rebi potemahi 12 mil,
 Isacara potemahi 12 mil,
 Dsaborona potemahi 12 mil,
 Jose potemahi 12 mil,
 Benjamin potemahi 12 mil quinaha najanorid-
 samanade.

Madija panahicca eterorideni nopoqquiri najaridenicca ima

⁹ Najaro ima jicadsapi ocattoma cananeje madija panahicca qqui onabaqquide. Qqui onabaqquiraha onocco ssonaqqui nade. Madija dsama onihi onihidsa madiridsamanajarideni mota, huapideni onihi onihi cajiridsamanajarideni mota, tohuatti onihi onihi cajiridsamanajarideni mota naco qqui onabaqquijaride. Deni tojahicca huihuittari bicabote cahittarinihuaji, Edede Bedi tedsejema huapima domodeni huajari. Eteroridenipa nopoqquiri najaro. Diodsa huatidsemanadsa birijari eppe dsojojo dsojojo canade. ¹⁰ Attideni mohui tadsa huahua quinade:

—Icca Dio deni tojajaripa pocca huihuittaridsa huittarijari.

Najaripa ia Tonassiajade.

Edede Bedijine naqui icassiejerajaro —quinade.

¹¹ Nahi deni tojahicca huihuittari bicabote cahittarini tadsajanima camittehe cajimanajarideni domo huahuajani, aja cacahuadedeni domo huahuajani, nahi idedenihuaji Diocca dodosse tabaqquideni huapima domo huahuajani najari. Najarideni huapimapa Diocca huihuittari tadsajanima pohuadeni pitodsa jassi tadsa tocatedsamanadsa assarideni namidsa bacco tadsapa Diodsa huatidsemanajari. ¹² Attidenipa ajama quinajari:

—¡Pajissa nema nana!

Dio, Tiadsa etidsedsa: Tiana deni tijani, inajaro.

Ticca deni tojehe nema dsanaponitohui.

Tiana nahato tinani ojari tani.

Tijine bica tani, icca Tamine deni tijani ojari tani.

Ticca dacorehe deni tojani, bica tani.

Tiadsa icca huatidsehe nema dsanaponitohui, inajaro.

¡Pajissa nema nana! —quinade.

¹³ Nadsapa cacahuade 24 quinajarideni ojaría ohuadsa huati tajari: —Aja eterorideni nopoqquri najaridenipa ¿nejecojarideni? ¿Nahato tinaqui? ¿Nejecohuajicca jahijonajari? —nade. ¹⁴ Naraha manaco pohuadsa huati onade: —Tiana nahato tinani —onade. Nadsapa ohuadsa huati tapomade: —Ajararidenipa namidsa ocasserani imeni tonahana-manaraha Jesocristo tahimari nebomana-jarajari. Edede Bedi Jeso pohua emene toccajarojine poccadeni tabaccorehe tomossijaro. Najaria aja etero noponi cajimanajaripaja. ¹⁵ Najaria aja Diocca huihuittari bicabote tadsajanima huapima domodeni huaripaja. Diodsa dada toqquimacca odsahuaji huatidsemanadsapa dsome dsepedeni ijimana, ssiaja dsepedeni ijimana najari. Deni tojahicca huihuittaridsa huittari canajaripa pohuadeni cacahuade pohuadenidsa madirid-sahitohui. ¹⁶ Nadsapa pemimana-jarahitohui, baccodeni naco dsarimana-jarahitohui. Maji ppoconejine imedeni camana-jarahitohui. Ppoconi naqui pohuadenidsa ocassera tejeranitohui. ¹⁷ Najaro ima tojanijinepi aja Diocca huihuittari bicabote tadsajanima Edede Bedi huarina pohuadeni ecahuabaqquihitohui. Pina edede cacahuade pocca edede ecahuabaqquijarissa nahitohui. Passo bicani camittehecca sibadsa qquenajarocca dse dse dsanapomanahijine pohuadeni eccaridsa-baqquihitohui. Poccadeni ojiepi Dio inajicanitohui. Noccodeni ppejene sse inaridsadsapa denima oji quina-jarahitohui —nade cacahuade ojaría atti.

8

Nepi tamaroni jicanicca ssoja ijidsajaro

¹ Papeo pico naqquni nepi tamaroni 7 najaro jicarinicca Edede Bedi ssoja ijidsadsapi memehuaaji madi-manajarideni huapima maji ojaria tocadidire najari. (Caria attidsapi: media hora, quinajari.) ² Dsotodepa Dio Pohua tedsejema pocca dodosse tabaqqui memehuaajicca 7 quinaha domo huahuajanihi qqui onabaqquijari. Pohuadenidsa jei jei 7 naha da inaridsajari.

Nahatohui majo bicabote

³ Dsotode Diocca dodosse ohuaha ccajonajari, nahatohui majo bicabote totohuessicca huahuanari tadsajanima huajari. Pohua dsepedsa tasao oro nahatoni majo bicabotejine dsojo icajidsajari. Nadsapa pohuadsa nahatohui majo bicabote huapi taha da quinajari, iessihi-jine. Iessidsapa essene majo Diodsa pajissa quinajaridenicca huatinaja tadsajani Diodsa bacco bacco tajaro. Nadsapa huihuittari bicabote tadsajanima totohuessicca huahuanari oro nahatoni tetepinidsa iessijari. ⁴ Nadsapa Diocca dodosse dsepedsa dsojo icajidsajari majo bicabote jamimine aja Diodsa pajissa quinajaridenicca huatinaja tadsajani toccamacossadsa Diodsa bacco tajaro. ⁵ Nadsapa Diocca dodosse tasao dsojo icajidsajaridsa majo bicabote totohuessicca dsippo ononi jadarini inajijaro. Nadsapi namihuaji quissa inaronaneje oppina tehe tojaridsajaro. Ttororo caneje, mohuini jidsa tehe tomohuiridseje, ssiehe caneje, namihuaji naqui nami dsadsa neje najaro.

Jejeidsa jei jei quinajari

⁶ Nadsapa Diocca dodosse tabaqqui 7 quinajari jei jei 7 naha cajimanajaridenipa najoramanajari, jei jei quinahi-jine. ⁷ Nadsapi Diocca dodosse tahidecca jei jei nanaja

passo ccara tojani, dsippo jadarini tohuemene queje-mehe quissa inaronajaro. Najarojine nami arobeni diji tadsapi ahua mota diji, dsero nemaneha diji taridsajaro. (Arobenipi caria attidsa: tercera parte, quinajari.)

⁸ Nadsapa Diocca dodosse dsotodecca jei jei nanaja jororoni imeni pina ssono imenissa najaro coro inaronad-sapi passo imenidsa ssonippajaro. Nadsapi passo imeni arobeni tohuemene tojaridsajaro. ⁹ Passo imeni abari mota jica, canoa imenibotecca mota tojica, canoa benedicca mota tojica najari.

¹⁰ Nadsapa Diocca dodosse 3'cca jei jei nanaja abadsico bedi mota cajirajari memehuaaji diji tocanaha jororone motarehema cassonajari. Nami arobenidsa cassonadsa hueni motadsa, passo sibadsa qquenajaro motadsa cassonipparidsajari. ¹¹ Abadsico bedi mota cajirajari onipa: Bidabote. Najarijine passo motapi tobidaridsajaro. Najaro passo dse quinadsapa madija huapi taha cacotaridsajari.

¹² Nadsapa Diocca dodosse 4'cca jei jei nanaja maji arobe totabaccora, abadsico arobe tocatabaccora, abadsico bedi mota totabaccoraridsa najari. Nadsapa huapima arobe ohuiridsajari. Najarojine ssiajani arobenipi tossiajani nejerani. Dsome arobeni naqui tossiajani nejerani.

¹³ Dsotode meme nopicossanidsa ssibiri potajari toccahi qqui onajari. Toccadsa atti mohui tahi omittajaro. Pohua atti ajama najari: —¡A, jaho! Namicca madijapa tohuati nahanaquiriti nahitohui. Nidsa Diocca dodosse tabaqqi ohuahadeni 3 quinajari jei jei quinadsapa ima denima oppina tanicca tojanitohui —nade ssibiri potajari.

9

Diocca dodosse 5'cca jei jei najari

¹ Nadsapa Diocca dodosse 5'cca jei jei nanaja memehuaajicca abadsico bedi namidsa cassonadsa

cahittahi qqui ocanajari. Najaripa Diocca dosseniji. Pohuadsa nami odini huaji tanicca pipico da inajari. ² Nami odini huaji tanicca noccobiji itabojidsaneje odi bodihujicca essenì qquenajaro. Pina dsippo imenibote jororoni essenissa najaro. Najaro meme ijidsapi tosohueni nadsa maji amossi najari. ³ Najaro essenidsa sese ahuatoma-manadsapa namihuaji jahironana canaridsajari. Nadsapa nami huapimadsa ijiridsajari. Madija itahuajina-manahijine comenedeni dacorehe cajiridsamanajari. Pina dsorima ssidede orissa naha pohuadenidsa da inaridsajaro. ⁴ Pohuadeni dossede attipa: —Dseropi tinajidsomana-jeraji, moro taridsahicca tinajidsomana-jarajo, ahua appani naqui tinajidsoridsamana-jeraji. Naraha madija assaridenidsa Diocca nanajano cappiramanajaridenira tinajidsoridsabaquimanajo. ⁵ Naraha tijinedeni ahua-jeraji, onajaro —najari. Nadsapa abadsico 5 canaha pohuadeni comene madijadsa inanaridsamanadsapi pina dsorima ssidede comene ahumanajarissa quinahitohui.

⁶ Nidsaranibote najaro ima tojadsapi madija ocasserani ahumanadsa attidenipa: —Ijica naccaraho —quinahitohui. Naraha dsoqqehe pohuadenidsa huaji tanitohui.

⁷ Sese huapimapa pina bojo jadsiretohui najoramana-jarissa quinajari. Tatidenidsapi oro nahatoni pina tamine taticcassa najaro huittariridsajaro. Panodenipa pina madija pano naridsamanajari. ⁸ Tatideni conepa pina amoneje tatinideni conanissa quinajari. Inodeni naco pina dsomaji inossa quinajari. ⁹ Pohuadeni assire cacahumanahijinepa ppejo nahatoni ccarabote jadsirejinecca huedsamanajari. Eppedeni mohui naco pina nami jojoppade bojocca huapi tehe jadsiretohui domoni toc-cajaro mohuini dacorajarossa najaro. ¹⁰ Dsoporidenidsa naco pina dsorima ssidede ori comenessa naha ca-

jiridsamanajari. Najaridsa abadsico 5 canaha madija inajidsobaqqui-manahijine. ¹¹ Sesedenipa tamine cajimanahi. Puhuapa nami odini huaji tanicca cacahuade. Pohua oni jiodideni atti ebreodsapa: Abadón, quiquinanajari. Dsama Cresiaccia madija attidenidsapa: Apolión, quiquinanajari. (Najaripa: Toponi nanajicade, inajaro.)

¹² Nadsapi ima oppinabote tahidecca jicaraha denima pamehe dsoriri taccani.

Diocca dodosse 6'cca jei jei najari

¹³ Nadsapa Diocca dodosse 6'cca jei jei nanaja tohuatti omittajaro. Dio baccohuaji huahuanari oro nahatoni orini 4 najaro nocconidsa tohuatti mohuini qqenajaro.

¹⁴ Najaro tohuattipi Diocca dodosse 6'cca jei jei najaridsa ajima najaro: —Diocca dodosse tabaqqui memehuaajicca 4 quinajarideni hueni imehi Eoparatehuaji ssoque toppidsa ecahuabaqquijari. Jahiridsahijine tappa tinabaqquijo —najaro.

¹⁵ Nadsapa Diocca dodosse tabaqqui 4 quinajarideni tappa inabaqquijari. Madija mota inajicaridsa-manahijine jai tojajari. Puhadenipa najaro imadsa dsepedeni ijiridsa-manahijinepa najoramanapojari. Aja pohuadeni dsepe ijihijinecca maji, huada, abadsico, huajano bacco tadsa dsepedeni ijimanajari. ¹⁶ Poccadeni soldado bojo idesda jassi tarijaridenipa 200 millones (200,000,000) quinajari.

¹⁷ Najaropi Dio Corimejine onoccodsa ahuato tajaro. Aja bojodsa jassi tarijaridenipa ajama quinaha qqui onabaqquide. Puhadeni bacco cacahuamanahijine ppejo nahatoni ccarabote cajiridsamanajari. Baccodeniccapi pina dsippo jororoni macco tajarossa najaro, pina meme sohuenissa najaro, pina azufre huesse tajarissa najari cajimanajari. Bojo tatidenipa pina dsomaji tatissa quinajari.

Pohuadeni ajaridsapi dsippo jororoni qquena, dsippo essen qquena, azufre majo tabaccora tajari qquena najari.

¹⁸ Aja bojo ajaridenicca 3 naha qquenajari comenejine madija mota cacotaridsajari. Najaropi dsippo jororoni, dsippo essen, azufre majo tabaccora tajari comenejine.

¹⁹ Bojocca dacorehepi pohuadeni ajaridsa, pohuadeni dsoporidsa najaro. Bojo dsoporidenipa pina maccassa naridsamanajari. Dsoporideni cotanidsa pina macca tatissa naha cajimanajaridsa comene inanaridsamanajaro.

²⁰ Naraha madija dsippo jororoni, dsippo essen, azufre majo tabaccora tajaridsa cacota-jarajari motadenipa bodideni cacajiquimera-jarajari. Tabaccorehe inamanajarocca nebomana-jarajari. Aja Satanacca dodosse tocorimedenidsa huatidsede nebomana-jarajari. Pohuadeni cacahuade pohuamacca pina ccarara bicabote oro, plata, bronce nahatoni, siba, ahua nahatoni naqui huapimapi qquide ssamoqquri, mittamanahijine ssamoqquri, jahiridsahijine ssamoqquri naraha najaridsa huahuatidsemana najari nebomana-jarajari.

²¹ Madija nanadsoqquede, caribajade, huananehe, botie naco nebomana-jarajari.

10

Diocca dodossepa papeo bedeni dsojo tojidsajari

¹ Nadsapa memehuaji qqui onanaja Diocca dodosse dacorabote ohuaha meme essenima quejemaha ccaronajari. Pohua tatidsa meme janoni porimacossanissa najaro cajijari. Panopa pina maji ssiejenessa najari. Issopa pina dsippo jororoni pamajarossa najaro. ² Pohua dsepedsa papeo pico naqquni bedeni dsojo ijidsajaro. Pohua amori nahatoniccapi passo imeni tetepidsa cahari, amori ssamo-huajiccapi namidsa cahua nadsa huajari. ³ Jadsirema johua nadsapa pohua atti mohuini pina dsomaji huahuade

huahua najari mohuinissa najaro. Aja pohua johua nanaja ttottorode 7 nehe tomohuiridsadsapi attinideni omittajaro. ⁴ Ttotorode attini jicadsapi attinideni dsodo onanitoahiraha memehuaicca atti omittajaro. Ajama najari: —Ttotorode attini timittajaropi tia motta tibodidsa tecahuaji. Dsodo tejeraji —najari.

⁵ Naraha aja passo tetepidsa amori cahari, namidsa amori cahua nadsa huajaripa pajissara huati tahijine pohua dsepe nahatonicca memehuaaji da icanajaro. ⁶ —Aji huati onajaropi Dio Pohua onima pajissara huati onajaro. Diopa nadsama madijonajari. Meme inahato, nami inahato, passo imeni inahato najaro. Aja Dio Pohua inahatoridsajarodsa madiridsamanajari naco Dio Pohua inahatoridsajari. Ohuattipi pajissa. Ima jicanijinepi najojeranitohui. ⁷ Diocca dodosse jicarihicca jei jei nadsapa Diocca ima ajijaro dsamacca madijadsa ahuato inanapojeraccajaro ahuato inananitohui. Najaro imapi Diona Pohua Atti cacomeraquiquiri najarideni mari icanabaquipojari —najari.

⁸ Aja memehuaaji atti omittapojari ohuadsa huati tapomajari: —Jari, passo imeni tetepidsa amori cahari, namidsa amori cahua najaridsa ticcaji. Pohua dsepecca papeo pico naquini tohuabajaro tidiji —najari. ⁹ Nadsapi Diocca dodossehuaji occajaro. Papeo pico naquini bedenitohui pohuadsa huati onajaro. Nadsapa ohuadsa huati tajari: —Aja, ajijaro papeo tijipaji. Tejeridsapi majona tajaro. Pina jidsi oquinessa nanitohui. Naraha tidsonedsana tobidani nanitohui —najari.

¹⁰ Nadsapi Diocca dodosse dsepecca papeo pico naquini bedeni odidsa ojipajaro. Ohuajaridsapi majona tajaro. Pina jidsi oquinessa naraha ohuidsonedsana tobidani najaro. ¹¹ Nadsapa ohuadsa ajama najari: —Madija huapimadsa, aja dsama onihi onihidsa

madiridsamanajaridenidsa, tohuatti onihi onihi cajiridsamanajaridenidsa, taminedenidsa naqui Dio pohuadenidsa inananijine tahimari huati tinaridsapomaji –najari.

11

Dio Atti cacomerabote pamahacca ima

¹ Nadsapa ohuadsa nanattome huenicca bobassa najari da inajari. Nadsapa ohuadsa da inajaripa ohuadsa huati tajari: –Titehemadsa ticcaji, Jerosarecca Diodsa dada toqquimacca odsa nattome, Diodsa da tahijinecca huahuanari nattome taji. Nahicca madija Diodsa huatidsemanajari hua taridsajo. ¿Nejecoma quinaha animanajari? –najari. ² –Naraha Diodsa dada toqquimacca boronipi nattome tejeraji. Najaro boronipi jodio quejena-jarajaridenidsa tojani. Najaridenipa abadsico 42 canaha Diocca odsa panani bicabotedsa madimanadsapa pohuadenijine totabaccoranitohui. ³ Nadsapa Dio Atti cacomerabote pamaha ocadossebaqquihitohui. Etero jidsa tanicca pina madija ocasserani ahuamanadsa huedsamanajarissa najaro huedsamanadsa huada 1,260 nehe (abadsico 42 canaha) nama quinahitohui Dio Atti ehecomeramana nanitohui –najari.

⁴ Aja Dio Atti cacomerabote pamahapa pina ahua onini oribo pamahassa quinajari. Pina jojororo pinine capamahassa quinajari. Ia Medsede dsama nemaneha Cacahuade tedsejema huatide bajari. ⁵ Madija attidenipa: –Dio Atti cacomerabote pamaha inajidsobaqquina –quinaraha manacora pohuadeni ajari jororoni qquenajarodsa pohuadeni jarade diji tocaniredsapa ono toquejenahissa tahitohui. Nama quinadsa pohuadeni najidsode tohuini quinajarideni tojicahitohui. ⁶ Dio Pohuajine nahatohue

cajimanadsapa memecca passo ecossamanajaro. Abad-sico 42 canaha Dio Atti cacomerade toquejenadsapa pohuadenijine namihuaji passo qquejerajaropaji. Dio Pohuajinea nahatohue onihi onihi cajimanadsapa pohuadenijine passo tohuemene tojajaro. Ocasserehe onihi, onihi naqui dsama nemanehedsa inanaridsamanajaro. Pohuadenipa: —Ijine madija ocasserani ahuamanana —quinadsapa nema inanamana-dsanapojaropaji.

⁷ Dio Atti ecomera-ridsamanajaro jicanissa tadsapi bani siri imehi jidsabote nami odini huaji tanihuaji qquenadsapa pohuadenidsa ssonarihithohui. Pohuana deni tojadsapa inapamajonahithohui. ⁸ Nadsapa ia Medsede ahua porimacossanidsa coba idsanamanadsa dsoqquehicca odsa pananicca jahuidsa assiredeni pparahi codahithohui. Najaro odsa panani oninipi Jerosare naraha onini ponimacca hua quinajarona: Imasiri sseqquiri najaridenicca odsa panani Sodoma, quiquinanajari. Onini onihi naqui: Diodsa iboqquri najaridenicca dsama Ejito, quiquinanajari. ⁹ Nahidsa huada 3 denima huada arobeni assiredeni codajari qquide madija jahijonana canahithohui. Madija panahicca ohuaha ohuaha naridsamanajarideni mota, madija huapideni onihi onihi cajiridsamanajarideni mota, tohuatti onihi onihi cajiridsamanajarideni mota, dsama onihi onihidsa madiridsamanajarideni mota jahijonana canahithohui. Najarideni huapimapa ppa idsabaquimana-jarahijine eccocobaqqi-manahithohui. ¹⁰ Dio Atti cacomeraqquri najarideni pamahapa ajijaro dsamacca madijadenidsa oppinehe imeni inanaridsamanajarojine pohuadenidsa nacasseraqquri najari. Nadsapa topamajonajarijine madijapa huatidsemaneri nahithohui. Catidserara canadsapa pohuadeni dsepetaji pohuadeni tessedsa manaconi jirehe ahuaji da, ahuaji da quinahithohui.

¹¹ Naraha huada 3 denima huada arobeni jicadsapi Diojine camittemani-manadsa totehema-manajari. Nadsapa madija huapima cattomama canajarideni cappinamanahissa tajari. ¹² Nadsapa aja Dio Atti cacomeraqqiri najarideni pamahapa memehuaajicca atti mohui dacoraha mittamanajari. Pohuadeni pamahadsa: —¡Nija, ahuaji ticadamacossaji! —najari. Nadsapa pohuadeni huadide cattomama canaraha meme essenima quejemamanaha tohuedamacossajari. ¹³ Naneje amadsati namidsadsa imeni tojadsapi odsa panani mota barari-ridsadsapi catotaridsajaro. Najarojine madija 7 mil (7,000) quinaha jicajari. Nadsapa tocassiejerajaridenia cappinamanadsa: — Memehuaaji madijaripa Dio dacorahi, deni tojahi —quinajari.

¹⁴ Nadsama ajijaro dsamacca madijadsa ima oppina tajaropamehe jicaporaha nidsa onihi tojapomaccanitohui.

Diocca dodosse 7'cca jei jei najari

¹⁵ Diocca dodosse tabaqqi 7'cca jei jei nanaja memehuaaji attideni mohuiqqiri naha huati huati toquinajari: —Jidapapi dsama huapima ia Medsede Diocca cacahuehe toja,

Cristo-Mesiacca cacahuehe toja najaro.

Pohuadenina dossede nama dsanapomanahitohui —quinajari.

¹⁶ Nadsapa cacahuadedeni 24 quinaha Dio tedsejema taminedenicca huihuittaridsa jassi tarijaridenipa pohuadeni pitodsa jassi tadsa tocattedsa-ridsamanadsa panodeni namidsa bacco taridsadsapa Diodsa huatidsem-anajari. ¹⁷ Nadsa attidenipa:

—Ia Medsede Dio Tiapi dacorabote ojari tani.

Tiapi nadsama timadipojaropi timadi-dsanapojaro.

Tiadsa etidsejaro, ima bicani tinanani.

Aji ticca dacorehe huapimadsa tijine ahuato tinanaridsajaro.

Jidapapi dsama huapima dossede tijajaro.

¹⁸ Nadsapi dsama onihi onihi naridsajarocca madija tiadsa huadimanajari.

Naraha jidapanana ticca huadie tojaridsanijinecca huada bacco tani.

Nadsapa jicamanapojaridenicca ima pohuadenidsa huati tinadsapi poccadeni imasiri manaconi pohuadenidsa najidsohue tinassonaridsanitohui.

Naraha ticca medse Tetti cacomeraququiri najaridenidsapi manaconi bicabote da tinaridsanitohui.

Tiadsa toquejenajari huapimadsa naqui da tinaridsanitohui. Najaro manaconi bicabote da tinaridsajaropi ajamani toquejenajaridenidsa, deni toquejenajari-denidsa aja huapima tinoppine cappinamanadsa Tettidsa iboraququiri najaridenidsa tinanaridsanitohui.

Jidapana naqui ajijaro dsama inatabaccoraridsamanajarodenicca tabaccorehe manaconipi pohuadeni tinajicahitohui –quinajari cacahuade 24 quinajarideni.

¹⁹ Nadsama memehujicca Diodsa dada toqqimacca noccobiji tohuabajaro. Najaro bodidsapi Moisesicca madija Dio Pohua tedseje jehe canirejaricca baho cahato najaro. Nadsapi ssiehe canaridsajaro, mohuini imeni tomohuiridsajaro. Ttottorode ttororo canaridsajaro, nami naqui dsadsa najaro. Passo ccara tojani naqui jadsirema catojaridsajaro.

¹ Ima nahatoqquiri inanijine memehuaaji amoneje ahuatōjaro. Ponicca eteropi pina maji ssiejenessa nehe huedsajaro. Abadsico tetepidsa huarijaro. Tatinidsa tamine taticca huittaridaridsa abadsico bedi 12 canaha cajihuajanijari. ² Najaro amonejepi idsonidsa ejedeni huittidsajari. Tossonahijine comadsapa johua johua najaro. ³ Dsotode naqui memehuaajicca ima onihi nahatoqquiri inanijine ohuadsa ahuatōjaro. Qqui onanaja pina huama imehibotessa naraha jidsa tajari. Macco tajari. (Caria attidsapa: dragón, quinajari.) Tatipa 7, ori 10 najari. Tati 7 najarodsa tamine taticca huittariridsajari. ⁴ Nadsapa huama imehibotepa abadsico bedi mota (Caria attidsapa: tercera parte, quinajari) pohua dsoporidsa jadsirema johue inaronabaqquidsapa namihuaji hua inaronabaqqujari. Nadsapa huama imehibote amoneje idsoni comajaro tadsajanima huajari. Ejedeni tossonadsapa amadsati jipahijine najorajari. ⁵ Naraha ponicca ejedeni maqquideje bedi tossonadsapa madijari. Najaripa nidsa dsotode dsama huapimacca tamine dacorabote tojahitohui. Pocca dsodsojo ccanaja tajaridsa pocca madija dosse dosse nahitohui. Naraha ponicca ejedenipa todinimacossanijari. Nahi Dio Pohua huittarihidsa dossede huittarijari. ⁶ Naraha imenipi dsama huamoni ssono caji, siba caji tanihuaji joppa tajaro. Aji poni joppa tanihuaji madinijinepi Diojine najorapojaro. Nanihuajipi taparini cajidsanaponijine huada 1,260 nehe madijaro.

⁷⁻⁸ Dsotodepi meme napicossanidsa jadsire tojani qqui onajaro. Diocca dodosse tabaqquidenicca tamine Miqueopa pocca dodosse tabaqqui tedseje huama imehibotedsa jadsire inanamanajaro. Huama imehibotepa pocca dodosse tabaqquima Miqueocca dodosse tabaqqui tedseje cahadiremanaraha huamadenipa deni toquejenahijine pajiramana-jarahi. Memehuaaji madimana-

pomahijinepa jicani. ⁹ Nadsapa huama imehibote cco inaronamanajari. Najari huama imehibotepa maittaccadsama pina maccassa naha ahuatopojari. (Najarina Adana Ebadeni icamaidsa-baqqipojari.) Pohua oni ohuahapa: Diocca huadi Satana, quiquinanajari. Pohua, pocca dodosse tabaqquma namihuaji hua inaronamanadsapa namidsa catojaronajari. Nama nadsapa dsama huapimacca madijadsa maidsa maidsa nanaridsa najari.

¹⁰ Nadsapi memehuaji tohuatti mohuini omittajaro attipa:

—Jidapanana ia Medsede ia tonassiajabaqquihicca ima bacco tani.

Jidapanana Diocca dacorehe, pocca cacahuehe iadsa ahuatotani.

Dio pocca Cristo-Mesia pohua dosse dosse nahicca ima bacco tani.

Ajana, imecotedeni tahimari pohuama huatijide rabote Satanapa coro inaronajari.

Dsome, ssiaja, dsome, ssiaja icca Abi Dio tedsejema imecotedenicca ima huati huati nanaja naraha jidapapi pocca ima jicani.

¹¹ Imecotedenipa deni toquejenajari. Satanapa ajamani tojahi.

Edede Bedi Jeso dsoqquedsa emene toccajarijine, pohua tahimari ecomeraridsa-manajarojine naco deni toquejenajaripaja.

Pohuadenipa dsoqquehe noppineni cappinamanajarajari.

“Idsoqquedsa naqui bica tani. Dio inebo-jarahitohui” quiquinanajari.

¹² Nadsama memehuaji timadimanajaro huapimapi tetidsemaneri naji.

Naraha aji namihuaji timadimanajaro, passo imenihuaji timadimanajardenipi tohuati nahanaqquri tiquinani.

Tiadenidsa ima oppina tehe tojaridsanitohui.
 Diocca huadipa tiadenidsa huadihijine toccaronajari.
 Pocca ima jicabote nani nahato tadsapa huadie imeni
 cajijari

—najari memehuaaji tohuatti mohuini omittajaro.

¹³ Huama imehibote bodi huatodsapa: —A, namihuaji ohua coro naronajariraha —najari. Nadsapa amoneje ejedeni maqquideje bedi cajije najaro inanasoqquenijine qquidso qquidso naridsajari. ¹⁴ Naraha amoneje huaji tani toccanijinepi pina ssibiri imehibote eppessa najari capamaha da quinajari. Nadsapi poni madinijine dsama huamoni ssono caji, siba caji tanihuaji huama huaji tahihuaji toccanijine appani cajijaro. Nanidsapi poni ecahuamana-dsanapodsa huajano 3 denima huajano arobedsa madinijine. ¹⁵ Naraha huama imehibotepa amoneje toccanijine najorani qqui tadsa pohua ajaridsa passo motarema capiri inajaro, hueni tocajadsa totabonijine. ¹⁶ Naraha namipi amoneje acco icamajaro. Nami odini tohuabajaro. Pina ajarini cajijarossa najaro. Nadsapi huenicca passo nemanehe dappi idsimajaro. ¹⁷ Nadsapa huama imehibote amonejedsa denima huadi tadsapa poni potemanidsa jadsire inananijine toccajari. Aja Diocca dossenijidsa iboraqquri najari, Jesocristo tahimaridsa disseraqquri najaridenidsa jara jara najari. ¹⁸ Nadsapa huama imehibote passo imenicca ssiquidsa huajari.

13

Bani siri jidsabote passo imenidsa qqemorajari

¹ Ocattoma cananaja bani siri imehi jidsabote passo imenidsa qqemorajari. Tati 7, ori 10 naha cajijari. Ori huapimadsa tamine tatidenicca huittariridsajari. Bani siri tati huapimadsa tohuaoni tabaccora tanicca dsodo

naridsajaro. Tohuaonipi Diodsa ocassera tani. Pina Dio onidsa tatamasso najarissa najaro. ² Bani siri jidsabote qqui onadsapa assire pina dsomaji jano potahissa naraha amoripa pina bani siri imehi oso amorissa najari. Pohua ajari naco pina dsomaji huahuade ajarissa najari. Huama imehibotepa bani siri jidsabotedsa pocca dacorehe da inajaro. Pocca huihuittari bicabote naqui pohuadsa da icanajaro. Najarodsa huittaridsa dossehe dacoraniccadsa dossede tojahijine huama imehibotecca dossehe bani siri jidsabotedsa da inajaro. ³ Bani siri jidsabote tati 7 naraha tati ojariepi biqueradsa pina dsoqquejarossa najaro. Naraha bejorini ccaqquidsapi camittemanijaro. Nadsapa dsama huapimacca madija huajo caniredsa pohuatohui disseraquiri najari. ⁴ Huama imehibotedsa huatidsemanajari, aja bani siri jidsabotedsa pocca dossehe da inajarojine. Bani siri jidsabotedsa naco huatidsemanajari. Pohuadeni attipa: —Bani siri jidsabotepa dacorajari. Pina aja pohuassa najari nohuerahi. ¿Nejecojarina pohuadsa ssonaridsa deni tojahijine pajirahi? —quinajari.

⁵ Bani siri jidsabotepa Diodsa tatamasso nadsapa: —Dio nohuerahi, ohuana huapimadsa deni ojani ojari onani —nanaja najari. Naraha Diopa bani siri jidsabote dossede tojahijine ecossa-jeraccajaro. Abadsico 42 canaha dossede tojaccajari. ⁶ Nadsapa atti tabaccora tadsa Diodsa atti atti dsanapojari. Dio oni ajimani inanajaro. —Diocca mamadi tabaccora tani —nanaja najari. Memehuaji madimanajaridenidsa naco tatamasso najari. ⁷ Nadsapa bani siri jidsabotecca ima huacossa-jeradsapi Diodsa toquejenajarideni tedseje cahadiremana-dsanapojari. Deni tojadsapa motapa inajicaridsajari. Nadsapa madija huapideni onihi onihi cajiridsamanajarideni, tohuatti onihi onihi cajiridsamanajarideni, dsama onihi onihidsa madiridsamanajarideni naco bani

siri jidsabote pohuana dosse dosse najari. ⁸ Ajijaro namidsa madiridsamanajarideni camittehe cajimana-dsanapohuijinecca papeodsa onideni dsodo nani nohuerajaripa bani siri jidsabotedsara huatidseridsa-manajari. Najaro papeo dsodo nanipi dsama nahatoponidsama Edede Bedi Jeso pohuana ecahuajaro. Pohuana camittehe issiajanicca icajiridsanijine dsoqqejari.

⁹ Teribodeni ticajimanadsapi ohuatti timittamananissa taji. Bani siri jidsabote tamine tojadsapa Diocca madija ajama quinahitohui:

¹⁰ Diocca madija toponi cocorodsa hua todsimahijinepa itadamamanadsa hua todsimahitohui. Diocca madija huahuajinadsa itahuajinamanahijine naco huahuajinadsa tojicahitohui.

Najaro ima tojadsapi Diocca madijapa ajama quinahitohui: Oppinani ahahuamana naraha Diocca dacorehema mohuaradsa ihinahanamana nanitohui. Ocasserani ahahuamana naraha Diodsa jehe quinahi nebomanajarahitohui.

Bani siri ohuaha namidsa qqenajari

¹¹ Qqui onapomanaja bani siri ohuaha namidsa qqenajari. Ori pamajari, pina edede bedi orissa najari. Naraha pohua attipa pina huama imehibote attissa najari. ¹² Pohuapa tahidecca bani siri jidsabotecca dossehe cajijari. Nadsapa namihuaji dossede tojadsa aja tahidecca bani siripa cattade huajari. Nadsapa bani siri dsotodeccana namidsa madiridsamanajarideni huapima tahidecca bani siridsa huatidsemanahijine icadossebaqqijari. Aja pohuadsa huatidsemanajaripa tati biqueradsa dsoqqeraha bejo ccaqquidsa camitemanijari. ¹³ Bani siri dsotodecca naco canahatori canajari. Pohuajine memehuaji jororoni ccaronadsa namidsa

bacco naronajaro. Madija huapima qqui toquina-jari. ¹⁴ Namihuajicca madija icamaidsabaqquihissa tajari. Tahidecca bani siri jidsabote cattade huahihuaji canahatoriri canadsa madija huapima pocca maidsehedsa pajissa quinajari. Pohuadeni icadossebaqquid-sapa tahidecca bani siri jidsabote corime sibadsa inahatomanajaro. Najari bani siripa massito jadsira tocanajarodsa tati biqueraraha madicajari. ¹⁵ Naraha bani siri dsotodeccadsa dacorehe da inadsapi tahidecca bani siri corime camitta inanajari. Camittemanidsana atti cajidsapa pohua corimedsa huatidsemana-jarajarideni huapimapa jicaridsahijine icadossebaqqujari. ¹⁶ Nadsapa bani siri dsotodeccana denima ima inanajaro. Madija huapima tahidecca bani siricca nanajanodsa inajanoridsahijine icadossebaqqujari. Ejedeni, jadahi, dsepe ssequiri najarideni, cappiramanajarideni, madijacca dodosse toquejena-jarajarideni, madijacca dodosse toquejenajarideni huapima inajanoridsajari. Motapa dsepedeni nahatonihuaji inajanoridsa, motapa assaridenidsa inajanoridsa najari. ¹⁷ Aja bani siri jidsabotecca nanajano madija motapa pohua oni dsodo nani cajiridsamanajari. Motapa pohua onicca numero dsodo nani cajiridsamanajari. Madija pocca nanajano cappiramanadsapa mitta quinahijine ssamo, da quinahijine ssamo tanitohui.

¹⁸ Ajijaro ima nahatoqquiri tiquinanijinepi madija Diocca nahatohue cajijari bodi nahato tajarina bani siri jidsabotecca numero inatassaquina. Pocca numeropi madijadenicca. Najaro numeropi 666 najaro.

14

Edede Bedi 144 mil quinajarideni tedseje

¹ Nadsapa ocattoma cananaja Edede Bedi Jeso ssono Siodsa hua canahi qqui onade. Pohuadsa madija 144 mil

(144,000) quinaha domo huajari. Assaridenidsa dsodo nanipi Edede Bedi Jeso oni, Imehi oni cajimanajari qqui onajaro. ² Nadsapi memehuaji mohuini bica tehe omitajaro. Pina hueni huapima ssahaha canajarossa najaro. Pina ttottorode dacorabote mohuinissa najaro. Pina titirededeni huapi taha tire tire quinajari mohuissa najari. ³ Nadsapa 144 mil quinaha ajie dsati jiri jiri quinajari. Pihuadenipa Diocca huihuittari bicabote tadsajanima aja camittaquqiri najari 4 quinajari tedsejema, cacahuadedeni 24 quinajarideni tedsejema jiri jiri quinajari. Madija ohuahadenipa poccadeni ajie tocahatterahijine ssamoqquqiri naraha 144 mil quinajaridenira najaro ajie jiride nahatoqquqiri najari. Najaridenipa ajijaro namidsa madimanaporaha Dio idinibaquipojari. ⁴ Poccadeni ima ssiaja tajaro. Huananehe jirehe madimanajari. Amonejedsa ssamoqquqiri najari. (Najaro imapi dio pohuamaccadsa huatidsemana-jarajari.) Edede Bedi Jesodsa disseraqquqiri nadsapa pohuadsara ahuaji jai toja, ahuaji jai toja naridsajari. Najaridenipa namicca madija mota Dio idinibaquipojarsa Pihuadsa toquejenahissa, Edede Bedi Jesodsa toquejenahissa tahijine pina madijadenicca daniji bicabote Diodsa tojajarissa quinajari. ⁵ Pihuadenipa maidsehe huatiraqquqiri najari. Imasiri cappiramanaha madimanajari.

Diocca dodosse tabaqqi 3 quinajaridenicca ima

⁶ Nadsapi Diocca dodosse ohuaha qqui onade. Memehuaji ccahuajadsa Dio ia tonassajabaqquihijinecca ima eccahuajajaro, namidsa madimanajaridenidsa huati taridsahijine. Aja madija dsama onihi onihidsa madiridsamanajaridenidsa huati, madija huapideni onihi onihi cajiridsamanajaridenidsa huati, tohuatti onihi onihi cajiridsamanajaridenidsa naco huati naridsahijine.

⁷ Nadsapa pohua atti mohui tadsa huati tajari: —Dio noppine ticappinamanaji. Diodsa: “Tiana deni tijani” tiquinaji. Dsama huapimacca madijacca imasiri manaconi najidsohuepi Dio Pohuajine tojabote nani. Pohuana meme inahato, nami inahato, passo imeni inahato, passo sibadsa qquenanicca inahato naridsajaro. Pohuadsara tetidsemanaji —najari.

⁸ Dsotode Diocca dodosse ohuaha toccamissajari. Pohua attipa: —¡Odsa panani deni tojanicca Babironiapi jicani, jicani! —najari. —Najaro odsa pananicca madijajinepi dsama huapimacca madija Diodsa huatideni ajamanadsa Babironiadenicca huananehedsa toquejenaridsajari. Babironiadenipa Diodsa iboqquri nadsa poccadeni ibohuepi dsama huapimacca madijadsa dsapa taridsajaro. Pina noccodeni janoqquri nahijine dsedse coma tanicca da icanabaqquijarissa najaro —najari.

⁹ Dsotode Diocca dodosse 3'cca toccamissadsa atti mohui tadsa huati tajari: —Bani siri jidsabotedsa, pohua corime nahatohuidsa madija huahuatidsemana najaridenipa Diocca najidsohue inahanamananitohui. Bani siricca nanajano cajimanahijine iboraqquri nadsapa assaridenidsa cajimana, dsepedenidsa cajimana najaridenipa Diocca najidsohue inahanamananitohui. ¹⁰ Pohuadenidsa Dio huadidsapa najidsohue imeni najorajari. Diocca dodosse tabaqqui, Edede Bedi tedseje pohuadeni cattomama canahihuaji Dio nanajidso inanabaqquidsa jororoni azufre quejemanicca inahanamananitohui. ¹¹ Najaridenipa bani siri jidsabotedsa, pohua corime nahatohuidsa huahuatidsemana najari. Bani siricca nanajano cajimanagerahijine poni quina-jaradsa pohuadenipa dsippo jororonijine ocasserani ahuamanadsapa dsome, ssiaja, dsome, ssiaja jassi quina-jarahitohui —najari.

¹² Najaro ima tojadsapi Diocca madijacca ima ahuato

tanitohui. Diocca madijapa oppinani ahahuamana naraha Diocca dacorehema mohuaradsa ihinahanamana nanitohui. Najaridenipa Diocca dosseniji inapajiramananissa tajaro. Jesocristodsa naco disseraquiri najari.

¹³ Nadsapa memehuaji atti omittajaro. Ohuadsa ajama najari: —Ajijaro ima bicani dsodo taji —najari. —Aji jidapanaccadsama ia Medsede Jesocristodsa toquejenarideni jicamanapodsapa pohuadenidsa ima bicani tojanitohui —najari.

Nadsapa Dio Corime attipa: —Jehe, najarideni tojicadsapa jassi quinahitohui. Najo tanicca dsepedeni ihijimana najaro jicani. Aja Diodsa dsepedeni ijimanadsa pohuadenijine ima bicani tojajaroma memehuaji jai tojamacossahitohui —najari.

Namihuajicca bono naccadecca ima

¹⁴ Nadsapi ocattoma cananeje meme essenii nopo tani qqui onajaro. Najaro essenii tetepidsa huittarijaripa pina madijassa naha qqui onajari. Pohua tatidsa tamine tatticca oro nahatoni huittarijaro. Pohua dsepedsa massito jocacadsani jadsira tocanehe dsojo icajidsajaro. ¹⁵ Diocca dodosse ohuaha Diodsa dada toqquimahuaji qquenajari. Pohuapa aja meme essenii noponi tetepidsa huittarijaridsa jadsirema huati tajari: —Ticca massito jocacadsanidsa bono huissii tippiridsajo. Jidapanana dsama huapimacca bono jadabote tojahi, naccahi bica tahi —najari. ¹⁶ Nadsapa dsotode meme essenii noponi tetepidsa huittarijaripa nami tetepidsa pocca massito da icanadsa bono tajoppiridsadsapa inaccajari.

¹⁷ Nadsapa Diocca dodosse ohuaha memehuajicca Diodsa dada toqquimahuaji qquenajari. Najari naco dsepedsa massito jocacadsani jadsira tocanehe dsojo icajidsajaro. ¹⁸ Nadsapa memehuaji Diodsa da tahijinecca

huahuanari cahittarinihuaji Diocca dodosse ohuaha naco qquenajari. Pohuapa dsippo jororoni jinede. Nadsapa aja massito jocacadsani jadsira tocanehes dsojo tocajid-sajaridsa atti mohui tadsa huati tajari: —Namicca ppa nahi uva bono jadabote tojahi. Ticca massito jocacadsani jadsira tocanajarodsas uva dsepema namanaha huissi tip-piridsadsa tinaccaridsajo —najari.

¹⁹ Nadsapa Diocca dodosse nami tetepidsa pocca mas-sito da icanadsa namicca uva bono huapima tajoppirid-sadsapa inaccajari. Nadsapa uva ppejene tojahijine siba odini imenibotedsa hua idsajari. Nahidsa uva ttai ttai najaricca imapi Diocca huadie madijadsa tojanijinecca ima. ²⁰ Nadsapa odsas panani huapihuaji uva ttai ttai nadsa ppejene toccajari. Najari ppejene toccajaripa madija emenedeni uva ttaittadsa qquenajaro. Pina hueni tocadsajajarissa najaro. Bojo huahi dequeraraha ajaridsa bacco tajaro. (Najaropi 1 metro y medio.) Emenedeni toc-cabaquini huaji tani. Nattome inadsapi 300 kilometrossa nehe tojajaro.

15

Diocca dodosse tabaqqui 7 quinajari Dio icadossebaqquidsa najidsohue 7 najaro najoramanajari

¹ Memehujaji qqui onaneje itedsejemacca ima onihni denima jidsa tehe ahuatoni qqui onadsapi huajo onajaro. Diocca dodosse tabaqqui 7 quinaha ahuatomanajaripa najidsohue oppina tanicca 7 nehe madijadsa tojaridsanijine najoramanajari. Najaro najidsohuepi jicanicca. Nidsa najaro najidsohue 7 nehe tojaridsani nattinipi Diocca huadie jicanitohui.

² Nadsapi coridsa imenissa najaro naqui qqui onajaro. Pina siba cristaossa najaro tocassiejequimera

naraha jororoni quejemajaro. Nani coridsassa najaro-
 dsa madija domodeni huarijaripa Diocca daniji titire oni
 arpa dsojo dsojo tojidseri najari. Najaridenipa bani siri
 jidsabotecca imadsa dsori tocaniredsa deni toquejenajari.
 Bani siri jidsabotedsa pohua corimedsa naco jehe quina-
 jarajari. Pohua onicca numero pohuadenidsa nohuerani.
³Nadsapa titire arpadsa tire tire quinadsapa Diocca medse
 Moisesicca ajie, Edede Bedi Jesocca ajie jiri jiri quinajari.
 Ajiepi ajima canajaro:

—Jehe Abi Dio, nahatojide tijirani.

Tinahatoridsajari huapimapa bica tahi.

Tiapi ia Medsede dacorabote tijani.

Ticca cacahuehepi toccanissa tani.

Ticca ima huapimapi pajissehe ponira.

Dsama nemanehedsa madiridsamanajarideni cacahuade
 ojari tajaro.

⁴ Jehe ia Medsede Dio, nidsa huapima tinoppine
 cappinaridsa-manahitohui.

Huapimapa Tiadsa: “Bica tinani, deni tijani” quinahito-
 hui.

Tiana ojari tani. Tibodi ssiaja, huire tani.

Ticca ima pajiranissa tajaro qqui toquinadsapa

dsama nemanehedsa madiridsamanajarideni Tiadsa
 huatidsemanahijine jahijonana canahitohui
 —quinajari, jiri jiri quinadsa.

⁵ Najaro poccadeni ajie jicadsa ocattoma cananeje
 memehujicca Diodsa dada toquima bodihuaji tohuaba-
 jaro. ⁶ Najaro Diodsa dada toquima bodihuaji Diocca
 dodosse tabaqqi 7 quinaha jai tojenajari. Pohuadenipa
 najidsohue oppina tanicca 7 najaro cacahuadedeni. Etero
 onini lino bica tajaro, nopo, dsibehi tajaro huedsamana-
 jari. Ssoquerideni orocca biji metedenidsa bacco tajaro.

⁷ Nadsapa camittaquiri najari 4 quinajarideni ojariapa Diocca dodosse tabaqqui 7 quinajaridenidsa tasao orocca pohuadenidsa da icanaridsajari. Najari tasaodsapi Dio camitta taha madi-dsanapojaricca huadie tojaridsanijine najidsohue comabote ijiridsajaro.

⁸ Nadsapi memehujicca Diodsa dada toqquima bodihuajipi Diojine pocca deni tojehe, pocca dacorehe ahuato inajararo. Pina dsippo essenissa najaro ijiridsajaro. Nanihuajipi toqquedsimade ssamo taccani. Aja tasao 7 canajaricca najidsohue comabote tojaridsanijine namihuajipi Diocca dodosse tabaqqui 7 quinajari sso inaronamanehe jicadsana toqquedsimade toppineranitohui.

16

Tasao 7 canajaridsa najidsohue ijiridsanicca ima

¹ Nadsapa Diodsa dada toqquima bodihuajipi atti mohui dacoraha omittajaro. Pocca dodosse tabaqquidsa huati tajari: —Jari, jai tijaji! Jidapanana ojine ticcadeni tasaodsa najidsohue oppina tanicca ijiridsajarodsa onajidsobaqquihijine namihuajipi sso tinaronaridsamanajipi —najari.

² Nadsapa Diocca dodosse tahidecca toccajari, pocca tasaocca namihuajipi sso inaronajararo. Nadsapa namihuajipi madija huapima bani siri jidsabote janoma jahiridsajari pohua corime nahatohuidsa: —Ia cacahuade —quiquinanajaridenipa joro jadsidsi comene dacorahicca inahanamanajari.

³ Nadsapa Diocca dodosse dsotodecca naco pocca tasaocca passo imenihuajipi sso inaronajararo. Nadsapi passo tohuemene tojjajaro. Pina madija pohua tessejine dsoqquedsa emene toccabaqquijarossa najaro. Nadsapa passo abari huapima cacotaridsajari.

⁴ Dsotode Diocca dodosse 3'cca naco pocca tasaocca sso inaronadsapi huenicca passo, bijinicca passo, sibadsa qqenajarocca passo naqui tohuemene tojaridsajaro. ⁵ Nadsapa Diocca dodosse passo cacahuade atti omittadsapi ajama najari:

—Jehe ohua Medsede Dio, tibodipi ssiaja, huire tajaro.

Jidapana naqui timadini, Tiapi dsama tinahatojeraccadsama timadipojaro.

Madija tinajidsobaqquidsapa tijine pajiranissa tani.

⁶ Pohuadenijine ticca madija Tiadsa bicaquiri najarideni jicaridsajari.

Tetti cacomeraquiri najarideni naco inajicaridsamanadsapa emenedeni toccaridsajaro.

Jidapapa manaco tohuemene dse quinahijine pohuadenidsa da tinajaro.

Najaropi poccadene ima manaconi —najari.

⁷ Nadsapi Diodsa da tahijinecca huahuanarihuaji tohuatti mohuini qqenani omittajaropi ajima najaro: —Jehe ohua Medsede, Tiapi Dio Dacorabote, ticca pajissehema poccadene ima nattome tadsapi tijine pajiranissa tanitohui —nade tohuatti mohuini.

⁸ Diocca dodosse 4'cca naco pocca tasaocca majidsa sso inarijaro. Nadsapa maji icadossejari, pohua ppocone dacoradsa madija camanahijine. ⁹ Madija huapima camanahissa taraha Diodsa bodidene cacajiquimera-jarahi. Pohuadsa: —Deni tijani, nahatojide tijirani —quina-jarahi. Najidsohue comabote epeje inananjine Dio pajiraraha Pohua onidsa tatamasso quinajari.

¹⁰ Nadsapa Diocca dodosse 5'cca naco pocca tasaocca bani siri dossede tojahijinecca huihuittaridsa sso inaridsapi pocca cacahuehe nemanehetodsidsajaro. Nadsapa

pohuadenidsa comani dacoradsa pohuadeni ipoma inodeni dsaqui tocanamanajari. ¹¹ Comaqquri naraha poccadeni tabaccorehe nebomana-jarajari. Imedeni jadsijaro comani ahuamanadsapa Dio memehuaji madijaridsa tata-masso quinajari.

¹² Nadsapa Diocca dodosse 6'cca naco pocca tasaocca hueni imehi Eoparatedsa sso inaronadsapi sse tocanajari. Tada tocanadsapa maji ccajonahihuajicca taminedeni poccadeni madijama jahiqquimahijine pajiramana-jari.

¹³ Nadsapi ocattoma cananaja huama imehibote ajaridsa qqenahi qqui, bani siri jidsabote ajaridsa qqenahi qqui, bani siri ohuaha maidsehe mamaride ajaridsa qqenahi qqui onajaripa tocorime siri 3 quinaha pina torocacassa naha qqenaridsajari. ¹⁴ Najaridenipa Satanacca dodosse tabaqquideni. Pohuadenipa canahatorimana canajari. Dsama huapimacca taminedeni madiridsamanahihuaji jai tojaboqqujari, jadsiretohui inequeriqqui-baqquimanaridsahijine. Diocca huadie imeni tojaridsanijinecca huada bacco tadsapi taminedeni poccadeni soldadodenima Diodsa jadsire inanamananijine. Najaro huadadsa Dio Dacorabote deni tojahitohui.

¹⁵ Najaro imapi Jesocristo ia mari tocanabaqquidsa ajama napode: —Pina ticca odsadsa bobotide qquedsimahijinecca huada ssamoqquri tiquinajarossa nanitohui. Ohua occanipomanicca huada ssamoqquri tiquinani. Nadsapi tibodideni huatomananissa tadsa tiadeni tecahuaridsamanaji. Pina ticcadeni eteroma tinoccodeni barijarossa tiquinaji. Nema tiquinadsapi ima bicani ticajimananitohui. Naraha otohui timadimana-jeradsa occanipomadsapi pina madija ccoroje cappinajarissa tiquinanitohui —nade.

¹⁶ Nadsama Satanacca dodosse tabaqquidenipa ajijaro dsamacca taminedeni huapima poccadeni madijama inequeriqquimanajari. Aja inequeriqquimanahihujicca dsama onini jodiodeni atti ebreodsapi: Aramajedo, quinajari. ¹⁷ Nadsapa Diocca dodosse 7 quinajari jicahicca pocca tasaocca jappopponihuaji sso inajaro. Nadsapi memehuajicca Diodsa dada toqqumahuaji atti mohui ahuatojaro. Nahi Diocca huihuittari bicabote cahittarinihuaji pohua atti mohui tehe qqenajaropi: —Jidapapi jicani! —najari. ¹⁸ Nadsapi ssissiede ssiehe canajaro. Mohuini jidsa tajaro naqui tomohuiridsajaro. Ttottorode naqui ttororo canajaro. Nadsapi nami jadsirema dsa dsa najaro. Madija ajijaro dsamadsa madimanapodsama namidsadsa caji taporaha ajijaro namidsadsapi denima dacorajaro. ¹⁹ Nadsapi namidsadsa dacorajarojine odsa panani deni tojanicca Babironia nocconidsa huacca nadsapi arobeni 3 nehe tojajaro. Dsama onihi onihi naridsajarocca odsa panani naqui tohuedimaridsajaro. Diopa Babironiaccia ima huati ajama-jaradsa pocca najidsohue dacorajaro ponidsa inanajaro. Pocca huadie poni dse inanajarossa najaro. ²⁰ Passo imenidsa dsama huihuitidsacosseri najaro, ssono huapima naqui amossi naridsajaro. ²¹ Nadsapi memehuajicca passo ccara tojani pina sibassa najaro naqui catojaronajaro. Bedeni jerani, pina 40 kilossa najaro. Najaropi madijadsa catojariridsajaro. Nadsapa Diodsa tatamasso quinajari, najaro najidsohue pohuadenidsa oppina tadsa.

17

Amoneje huananehe imeni cajijaropi Diocca najidsohuedsa tojanitohui

¹ Nadsapa Diocca dodosse tabaqqi 7 quinajari tasao cajimanajarideni ojariapa ohuahuaaji ccajonadsa huati tajari: —Nija, ticcajonaji. Tiadsa ima ahuato onanana —najari. —Aji amoneje passo tetepidsa huittarjaropi huananari. Ponicca imasiri manaconi Dio inajidsonicca ima qqui tinanijine —najari. ² —Jehe, dsama huapimacca tamedeni poccadeni madijama ponicca huananehedsa toquejenaridsajari. Pina noccodeni janoqquri nahijine dsedse coma tanicca dse naridsamanajarissa najaro —najari. (Ponicca huananehecca imapi: Diodsa huatideni ajamamanadsa dio pohuamaccadsa huahuatidsemana najari.)

³ Nadsapa Dio Corime itedsejemacca ima ohua qqui tonanajari. Dsama huamoni ssono caji, siba caji tanihuaji Diocca dodosse ohua tohuaccajari. Nadsapi nanihuaji qqui onaneje bani siri maccohuidsa amoneje huittarini qqui onajaro. Bani siripa tati 7, ori 10 najari. Pohua huapidsa dsodo nani ijjaro. Najaro dsodo nanipi oppina tani, Diodsa tabaccora tajaro. ⁴ Bani siri idedsa huittarjaropi etero bicani sohueni macconi quejemani huedsajaro. Mattonicca, huaribonicca, bijinicca, issonicca huapima oro nahatoni cajijaro. Siba bedeni bicabote, perla noponi oro tadsajani quejemani cajidsamaro canajaro. Poni dsapanidsa dsedse oro nahatoni dsojo tojidsajaro. Ponicca dsedsedsa ijjaripa ponicca huananehecca ima. Diodsa ima oppina tanicca, tabaccora tanicca ijinissa tajaro. (Najaro imapi ponicca tabaccorehe, dio pohuamaccadsa huatidsejarocca ima.) ⁵ Assarinicca dsodo nanipi imittanijine ssamo inaccani. Najaropi ajima najaro: Odsa panani imeni Babironiapi huananehe jinede. Ponicca marinajajine ibohue, tabaccorehe tojaridsadsapi dsama huapimadsa ima tohuajari nadsa tehe tojaridsajaro. ⁶ Qqui onadsapi obodidsa nahato onajaro: Ponipi nocconi

jano tajaro. Diocca madija emenedeni, Jesocristo tahimari ecomeramanadsa inajicaridsamanajari emenedeni naqui dse nadsapi nocconi jano tajaro.

Najaro ima qqui onadsapi ojabojo najaro. ⁷ Nadsapa Diocca dodosse ohuadsa huati tajari: —¿Nejecotohui tijabojo najaro? Aji amonejecca ima ahuatora taraha tia onahattana. Aja bani siri tati 7, ori 10 najari pohua idedsa amoneje huittaridsa eccaridsajarocca ima naqui ahuatora taraha tia onahattana —najari. ⁸ —Aja bani siri qqui tinajaripa tahide madiporaha jidapapa pocca ima jicani. Naraha pohuapa nidsa nami odini huaji taniccadsa qquenahi ojarihitohui. Qquenahi nattipa coridsa imeni jororo cananihuaji pohua dsoqquehicca ima inahana-dsanaponitohui. Nadsapa ajijaro dsamacca madija tahide dsama nahatoponidsama camittehe cajimana-dsanapohuijinecca papeodsa onideni nohuerajarideni bani siri qqui toquinadsapa bodideni jabojo quinahitohui. Najari bani siripa madipojari, jidapapa madi-jarahi, nidsa dsotode canajoranipomadsa madija inajabojobaqquihitohui —najari Diocca dodosse ohuadsa.

⁹ Nadsapa denima huati huati tajari: —Ajijaro ima timittanissa tanijine najo tani. Diocca tohuattehe cajjarina mittahitohui —najari. —Aja bani siri tati 7 najaricca imapi ssono 7 najarodsa amoneje huittarijaro. Tati 7 najaricca ima onihi naqui tamine 7 quinajari. ¹⁰ Najari tamedeni mota 5 quinajaridenicca cacahuehepi jicapojaro. Ohuahapa jidapana dsama cacahuade tojaccahi. Ohuahapa nidsa dsotode dsama cacahuade tojahitohui. Naraha najari tamine dsama ecahuaridsadsapi huajano huapi tajarahitohui. ¹¹ Bani siri tahide madiporaha jidapana nohueraccajaripa tamine 8'cca tojahitohui. (Caria attidsapi: octavo, quinajari.) Tamine 7 quinajaridenidsa quejemaporaha nidsa dsotode tamine 8'cca tojadsapa

coridsa imeni jororo cananihuaaji pohua dsoqquehicca ima inahana-dsanaponitohui.

¹² —Bani siri ori 10 naha qqui tinapojaripa tamine 10 quinajaricca ima. Najaridenicca cacahuehepi nohueracani. Nidsa dsotode bani siri tedseje dossehe cajimanad-sapa maji ojariara dossede toquejenahitohui. ¹³ Nadsapa tamine 10 quinajarideni poccadeni dacorehe, poccadeni cacahuehepi bani siridsa inanamananijine jehe canirere canahitohui. ¹⁴ Najaridenina poccadeni madijama Edede Bedidsa jadsire imeni inanamananitohui. Naraha Edede Bedipa dacorehe deni tojanicca cajijarijine inajicahitohui. Puhuadsa toquejenajaridenipa Dio icattejidsa-baqqujari. Puhuadsa disseraqquri najari. Tamine huapi taraha Edede Bedi Jesopa huapimacca tamine deni tojahicca ojarijari. Madija medse totonanadedeni naco huapi taraha pohuapa huapima Medsededeni deni tojajari —najari.

¹⁵ Nadsapa Diocca dodosse denima ohua mari canajari. Pohua attipa: —Aji passo qqui tinajaro tetepidsa amoneje huananari huittari canajarocca imapi madija huapideni onihi onihi cajiridsamanajarideni, madija ohuaha ohuaha naridsamanajarideni, tohuatti onihi onihi cajiridsamanajarideni, dsama onihi onihidsa madiridsamanajaridenicca ima najaro. ¹⁶ Nadsama bani siripa pohua ori tamine 10 quinajarideni tedseje amoneje huananari ettajomananitohui. Ponicca etero ssiti quinadsapi ccorojani inebo-mananitohui. Poni imani naqui jipamanahitohui, dsip-podsa coro idsanamanadsapi ono tojanitohui. ¹⁷ Tamine 10 quinajaripa ssamoqquri naraha Dio Pohua jipa tahicca inanamananijine, bodideni inanajorabaqqujari. Puhuadenipa: “Bani sirina deni tojahi ojari nana” quinadsa jehe canirere canajari. Nadsapa bani siridsara ibo-raqquri dsanapomanajaria Dio Pohua huati tapojaricca ima jicani bacco toquinahitohui. ¹⁸ Nadsama amoneje

huananari qqui tinajaropi odsa panani imenicca ima. Najaro odsa pananipi dsama onihi onihi naridsajarocca taminedenidsa dossede tojajaro — najari Diocca dodosse ohuadsa.

18

Odsa panani imeni Babironia jicanissa tajaro tahimarini

¹ Ima qqui onapojaro jicadsapi Diocca dodosse ohuaha memehuaji ccaronahi qqui onajari. Dossehe dacoranicca cajjari. Pohua dsibehinejinepi nami huapima tossia-jabaquijaro. ² Nadsapa pohua atti mohui dacoradsa huahua najari:

—¡Babironia jicani, jicani! — najari. —Babironia odsa panani deni tojanicca jicani.

Jidapapa Babironiadsa Satanacca dodosse tabaqqi tocorimedenira madimanahi.

Abaridsa, mori, epe cajihni oppina tahicca huapima madimanahi.

Bani siri huadi tahicca naco madimanahi.

³ Aji Babironia jicajaropi dsama huapimacca madija ponicca huananehedsa toquejenaridsajari.

Noccodeni janoqqiri nahijine dsedse coma tanicca dse inaridsa-baqquijarissa najaro.

Dsama huapimacca tamine Diodsa iboqqiri najarideni ponicca huananehedsa toquejenajari.

Ponicca madija todsetajaji bicabote tohui disseraqqiri, jijipa huaticcara tahicca tohui disseraqqiri najarijine

dsama huapimacca dadadedeni Babironiadsa pohuadeni dsetajaji da da quinadsapa dsiniro tosserid-samanajari.

Najaro ima huapimajine Babironia jicajaro

— najari Diocca dodosse atti.

⁴ Nadsapi memehuaji atti onihi omittadsapi ajima najaro:

—Occa madija Babironiadsa timadimanajaropi ponicca
imasiridsa tiquejemamana-jeranjine jai tijenaji.

Babironiadsa najidsohue ssonarinitohui.

Najaro najidsohue dsori ticanirenijine huajiji tinaji.

⁵ Babironiaccas madija imasiri inanamanapojaropi inehemamanajaro.

Pina ssono dequerajaro memehuaji bacco tajarossa najaro.

Poccadeni ima tabaccora tajaro Dio huati ajama-jarajari.

⁶ Babironiapi madija inajidso-baqquijari manaco ponidsa najarossa nehe tojanitohui.

Pina ponijinessa nehe denima oppina tehe tinanamanaji.

Madijadsa imasiri inanaridsajaropi pina dsedse bidabote dse inanabaqquijarissa najaro.

Manaco ponidsa denima oppina tehe dse tinanamanaji.

⁷ Coma tanijine tinajidsomanaji. Ponipi: “Ohuapi deni ojaní” naneje najaro.

Poni dsapanitaji bicabote tohuini disseraqquri dsanapomanajari manacopa ponidsa comani imeni tinanamana-dsanapoji.

Poni bodinidsa: “Ohuapi ajidsa omadijaro, tamine deni tojanicca ojajaro.

Tabira ocaja-jerani. Nanajidso ojajeranitohui” najaro.

⁸ Poni attini nema nadsapi Dio Dacorabote attia: “Babironia onajicana” nadsapa ponidsa najidsohue imeni amadsati ssonarinitohui.

Ponicca madija huapi taha comabotedsa cacotaridsahitohui.

Motapa ocasserani ahuamanahitohui. Motapa pemi-manahitohui.

Nadsapi Babironia diji tehe jicanissa tanitohui

—najari Diocca dodosse.

⁹ Nidsa dsama huapimacca tamine, aja Babironiacca huananehedsa toquejenajari, pohuadeni tohuini quinahicadsa toquejenajari huapimapa odsa panani diji tadsa essenitoccamacossani qqui toquinadsapa oji oji quinahitohui. Pohuadenipa ponitohui oji oji quinahitohui.

¹⁰ Pohuadenipa Babironiadsa najidsohue ssonarijaro noppineni cappinamanadsapa huajima cattomama canahitohui. Pohuadeni attipa:

—¡Jaho! Babironia tiapi icca odsa panani deni tojanicca dacorabote tijaraha

amadsati ticca imasiri manaconi najidsohue tiadsa bacco tajaro —quinahitohui.

¹¹ Nadsapa dsama huapimacca dadadedeni naco pohuadeni dsepetaji mittade nohueradsapa ponitohui oji oji quinahitohui. ¹² Nadsama Babironia bica taccadsa pohuadeni dsepetaji ehecacajonamana najaropi oro, plata, siba bedeni huatini ccara tanicca, onihipi perla noponi bicabote, etero bicani onihi onihi nehe pina lino, seda, macconi purpura, denima macco tajaro naqui ehecacajonamana najaro. Ahua majoni bicabote cajinicca, elefante ino nahatohui, ahua huatini ccara tanicca nahatoni, ppejo onini bronze nahatoni, ppejo onini hierro nahatoni, siba sseque tajaro onini marmol nahatoni naqui ehecacajonamana najaro. ¹³ Dsamatapa quequejema canela, dsamatapa quequejema majo tahicca ohuaha ohuaha naco huemahi ehecacajonamana najari. Ahua majiconi tohuessidsa majo bica tajari, ahua onihi majiconi mirra ehecacajonamana najari. Majojo, uva ppejene, ahua bono oribo oquine, harina nappori tahicca, aroso jidsadsa trigo naco ehecacajonamana najari. Bohui, bojo todsepetaji jorede, edede, bojo madija jorede, nami jojoppade bojo joca joca ihicana najaro, madija naco ibotibaquimanadsa manaconedenitohui da quinahijine ehecacajonamana na-

jari. ¹⁴ Naraha Babironia jicadsapi dadadedeni ponidsa ajama quinahitohui:

—Jidapapi ahua bono ocassabote tohuini tanicca ticappi-ranissa tani.

Aji tia ticajijarocca huapima bicabote paji jicarihe nema dsanaponitohui —quinahitohui.

¹⁵ Nadsapa dadadedeni Babironiadsa pohuadeni dsepetaji da da quinapodsa dsiniro sseqquiri napojaridenipa ponidsa najidsohue oppina tehe ssonarijaro noppineni cappinamanahitohui. Nadsapa huaji tanidsa domo huadsa oji oji quinahitohui. ¹⁶ Pohuadeni atti ajama quinahitohui:

—Jaho, Babironiapi odsa panani deni tojaniccaraha jicajaro. Tohuati nahana tani.

Najaro odsa pananipi pina amoneje poni nabicajarocca imassa najaro.

Etero bicabote lino huedsa, onihi purpura huedsa, onihi macconi huedsa najaro.

Poni nehebedsodsapi oro, siba bedeni dsibehi tajaro, perla naqui mattonidsa, huaribonidsa, bijinidsa, issonidsa cajijaro.

¹⁷ Jehe poni bodini huato-jeraraha amadsati najidsohue bacco tajaro.

Ponicca dsiniro jica, bicabote jica najaro —quinahitohui dadadedeni.

Nadsapa canoa imenibote jinededeni, pohuadenidsa jahijonajarideni, canoa imeni ahaccadedeni, passo imeni-huaji tatarabidsadedeni huapimapa huajima cattomama canahitohui. ¹⁸ Babironia diji tani essenitoccamacossani qqui toquinadsa johua johua quinahitohui. Pohuadeni attipa: —¡Odsa panani deni tojanicca najarossa najaro nohuerani, nohuerani! —quinahitohui. ¹⁹ Nadsapa

ojejine ocasserani ahuamanahi ahuato tanijine pohuadeni tatidsa ssiqui huira narimanadsa jadsirema oji oji quinahitohui. Oji quinadsa attidenipa:

—¡Jaho, Babironiapi deni tojaniccaraha tohuati nahana tani!

Babironiadsapa dsiniro ssequire naha madimanajari.

Pohuadenijine passo imenicca canoa imeni jinededeni dsiniro huemani cajiridsamanajari.

Naraha huada ojarie amadsati jicani —quinahitohui.

²⁰ ¡Nadsapi memehuaji timadimanajarodenipi ajijaro odsa panani jicajarodsas tetidsemanaji!

Jesocristocca dodosse tabaqqi, Dio Atti cacomeraqquri najarideni, Diodsa tiquejenajaroden huapima tetidsemanaji.

Ponijine nanajidso tiquejenaridsapojaro manaconi jidapanana Dio inajidsojaro.

²¹ Nadsapa Diocca dodosse dacorabotepa siba imeni idimacossa najaro. Najaro sibapi imenibote pina aroso jidsadsa trigo ririassa najaro. Najaro siba imeni passo imenidsa coro idsippadsa pohua attipa:

—Babironia tiapi odsa panani deni tjaniccaraha ajijaro sibassa tanitohui.

Paji amossi taridsapi tia qqui quinapoma-jeranitohui —najari.

²² —Nadsama ticca jahui huapimadsapi titire oni arpa mohui todidi, totore mohuini todidi, jejei mohui todidi nadsapa madija mittamanapoma-jarahitohui.

Ticca tatarabadsadedeni naco amossihuajahitohui.

Trigo riria mohuini naqui todidi nanitohui.

²³ Tiadsa jojororo ssiejene naco nohuerahitohui.

Cacajirehicca ejete mohuini nohueranitohui.

Ticca todsepetaji dadadedeni dsama huapimadsa deni toquejenaraha jicanitohui.

Tiapi dsama huapimacca madija ticamaidsabaquid-
ridsajaripa
pina dsoppineje madija icamaidsabaquijarissa tajarojine
paji amossi tarinitohui – najari.

²⁴ Jehe, najaro odsa pananidsapi Dio Atti cacomeraquiri
najarideni inajicaridsamanajari. Diocca madija toqueje-
najarideni naco inajicaridsamanajari. Aja dsama huapi-
macca madija ijinedeni ahuamanadsa emenedeni toc-
caridsajarojine Babironiadsa Diocca najidsohue ssonari-
jaro.

19

Memehuaji huatidsehe tojaridsajaro

¹ Nadsapi Babironia diji tehe jicani nattinipi memeh-
huaji madija huapima attideni mohui tehe omittajaro.
Pohuadeni attipa:

—jAreroia, ia Medsede Diopa bica tahi! Pohuapa
tossiejehe jinede.

Ima huapimadsa deni tojjari. Pohuana denima dacorahi
ojarijari.

² Diopa pajissehedsa ima nattome inadsapi Pohuajine
pajiranissa tajaro.

Babironiacca huananehe dsama huapimadsa dsapa tarid-
sajaro manaconipi ponidsa ssonarinitohui.

Ponijine Diocca medse emenedeni toccaridsajari mana-
conedeni naco najidsohue oppina tajarodsa Dio
inajicajaro –quinajari.

³ Nadsapa huati toquinapomajari:

—jAreroia, ia Medsede Diopa bica tahi!

Babironiapi diji tehe jicaraha essenitoccamacossanipi
nebo-jeranitohui –quinajari.

⁴ Nadsapa cacahuadedeni 24 quinajari, camittehe ca-
jimanajari 4 quinajarideni tedseje Diocca huihuittari

bicabote tadsajanima pohuadeni baccohuaji domodeni pona nadsa Diodsa huatidsemanajari. Pohuadeni attipa: —¡Pajissa nema nana! ¡Areroia, ia Medsede Diopa bica tahi! —quinajari.

⁵ Nadsapa Diocca huihuittari bicabote cahittarinihuaji tohuatti omittajaropi ajima najaro: —Huapima Pohuadsa medse tiquejenajaro icca Diodsa jiri jiri tiquinaji.

Huapima Pohuadsa tidsepedeni ijijaro, Pohua noppine cappinaquiri tiquinajaro, aji deni tiquejenajarodeni, ajimani tiquejenajarodeni naqui Diodsa jiri jiri tiquinaji —najari.

Edede Bedi cacajirehicca ejete

⁶ Nadsapi memehuajicca madija huapima attideni mohuini omittaneje bica tajaro, pina hueni ssahaha canajarossa najaro. Mohuini onihi naqui pina ttottorode mohuini dacorajarossa najaro. Attidenipa:

—¡Areroia, ia Medsede Dio dacorabotepa deni tojahi! Jidapana huapima ecahuabaquihijine pocca cacahuehe bacco tani.

⁷ ¡Etidsena, etidseri nana! Diodsa: “Deni tijani, bica tinani” inana.

Jidapanana Edede Bedi cacajirehicca huada bacco tani. Pocca amoneje tojanijinepi najorani.

(Najaropi pocca madija najoramanajari, pohuadsa madi-manahijine.)

⁸ Etero huedsadsa najoranjinepi ponidsa etero onini lino bica tajaro, nopo, dsibehi tajaro da inajaro.

Najaro etero bicanicca imapi Diocca madija toquejenajari-deni bodideni inahirebaquidsa Pohuadsa madi-manahissa tajari —quinajari.

⁹ Nadsapa Diocca dodosse ohuadsa huati tajari: —Dsodo taji: Edede Bedi Jesopa pocca madijadsa huahua najari,

pocca cajicajicca jipaquiedsa jai tojedsimahijine. Jai tojedsimajaridenipa huatidsehe imeni cajimanahitohui —najari. Nadsapa denima huati tajari: —Aji huati huati onajaropi Dio Atti pajissacca —najari.

¹⁰ Nadsapi Diocca dodosse bacchohuaji opitodsa ohuitta nadsa pohuadsa ohuatidsenijineraha ohuadsa huati tajari: —Ohuadsa nema tejeraji. Ohua naqui Diocca medse ojani. Pina tia timecotedeni tedseje Jesocristo tahimaridsa disseraqquri tiquinajarossa onani. Diodsara tetidseji —najari.

Aji Jesocristo tahimari bicabotepi Dio Pohua Atti cameraqquri najaridenidsa inanadsana ehecomeramana najonajaropaji.

Bojo nopohuidsa huittarijaricca ima

¹¹ Nadsapi qqui onaneje meme tohuabadsa bojo nopohui ahuatotari. Najari bojodsa huittarijaripa Pajissehe Jinede. Pohuapa maidsera tajari. Dsama ecahuadsa, jadsire inanadsa naqui pohuajine pajiranissa tajaro. ¹² Pohua nocco dsibehi tajaro. Pina dsippo jororonissa najaro. Pohua tatidsapa tamine tatidenicca huapi taha tassaqquidsa huittarijari. Pohua oni dsodo nani cajiraha pohua motta nahato tahi ojari najari. ¹³ Pocca eteropi tohuemenedsa ibedsippani macco tajaro huedsajari. Pohua onipa Dio Atti. ¹⁴ Pocca madija memehujicca jajadsirededeni pohua natti jai tojamissajari. Poccadeni etero onini lino bica tajaro, nopo, obero tajaro huedsamanadsa bojo nopohuidsa huihuittariri naridsajari. ¹⁵ Pohua ajaridsa qquenajaropi pina massito cajadsire-qqumerajarossa najaro. Najarodsa dsama huapimacca madija inajidsoridsabaqquihijine. Dsama huapimacca tamine dacorabote tojadsapa pohua atti dacoradsa madija dosse dosse nahitohui. Pohuajinepa Dio Dacorabotecca huadie tojani qqui toquinahitohui. Pohuapa Diodsa iboqquri najarideni ttai

idsanacossabaquidsa mere huajahissa tahitohui. Pina uva ppejene toccahijine ttai ttai quinajarissa nahitohui. ¹⁶ Pocca eterodsa, pohua panaccodsa naqui dsodo nanicca imapi: —Tamine huapi taraha Jesona tamine deni tojahi ojarihi. Medse cajimanahi huapi taraha Jesona ia Medsede deni tojahi ojarihi —najaro dsodo nani.

Bojo nopohuidsa huittarijari deni tojajari

¹⁷ Nadsapa qqui onanaja Diocca dodosse majidsa huarishi qqui onajari. Puhuapa meme abari banicca jipaquuri najari meme napicossanidsa jahiridsajari-denidsa jadsirema huahua najari: —¡Nija, jai tijajonaji! Diocca jipaquie imenibotedsa tijipamananijine tiqueriquimanaji —najari. ¹⁸ —Tijipamananijinepi tamine imedeni, soldadodenicca tamine imedeni, jadsirecca dacoraquuri najari imedeni, bojo imedeni, bojodsa huihuittaride imedeni, madijacca dodosse toquejena-jarajari imedeni, madijacca dodosse toquejenajari imedeni, ajamani toquejenajari imedeni, deni toquejenajari imedeni naco tijipamananitohui —najari.

¹⁹ Nadsapa qqui onanaja bani siri jidsabote, dsama huapimacca taminedeni, poccadeni soldadodenima jadsire inanamananijine queriquihi qqui onabaquijari. Aja bojo nopohuidsa huittarijaridsa ssonarimanahijine, pocca soldadodenidsa naco ssonarimanahijine najoramanaha domo huajari. ²⁰ Cahadiredsapa bojo nopohuidsa huittarijarina pocca madija tedseje bani siri jidsabote dama quinajari. Bani siri ohuaha maidsehe mamaride naco dama quinajari. Najari deni siri jidsabote to-cattahihuaaji canahatori canapojari. Najari naco madija icamaidsabaquidsapa bani siri jidsabote janodsa inajanoridsapojari. Najari pohuajine naco bani siri jidsabote corimedsa huatidsemanapojari. Nadsapa najari bani

sirideni pamahapa camittaquiri naraha coridsa imeni azufre jororo cananidsa cororo todsippajari. ²¹ Nadsapa bojodsa huittarijari pohua ajaricca massito cajadsire-qquimera najarodsa bani siricca soldadodeni inajicajari. Nadsapa meme abari madija imedeni jipamanadsa accaraqquiri najari.

20

Huajano 1,000 nahicca ima

¹ Nadsapa qqui onapomanaja Diocca dodosse nami odini huaji tanicca pipicoma ccaronajari. Cadena imehibote naco pohua dsepedsa dsojo inaronajari. ² Najari Diocca dodossepa huama imehibote dama inadsa jore inaqquijari, huajano 1,000 (mil) naha ccaridsa-jarahijine. Najari huama imehibotepa maittaccadsama pina mac-cassa naha ahuatopojari. (Najarina Adana Ebadeni icamaidsabaquipojari.) Pohua onipa Satana, Diocca huadi najari. ³ Nadsapa nami odini huaji tanihuaji coro id-simadsa noccobiji ecossanissa tajaro, qquena-jarahijine. Noccobiji huapihuaji modsassa najarodsa nepi inacossajaro. Nadsapa huajano 1,000 naha dsama huapimacca madija icamaidsabaqqui-jarahijine. Huajano 1,000 naha jicadsana tappa inadsapa huada pamehe ccaridsadsa madijadsa maidsa maidsa naridsapomaccacchitohui.

⁴ Qqui onanaja taminedenicca huihuittaridsa jassi tariridsajari qqui onabaqquijari. Pohnadenipa ima icattamananijine Diocca dossehe cajimanajari. Nahidsa naco madija mattodeni ca ca tojidsamaneri napojarideni qqui onabaqquijari. Najaridenipa Jesocristo tahimari nahatoquiri najarideni Dio Atti ecomera-ridsamanajarojine inajicabaqqui-manapojari. Pohnadenipa bani siri jidsabotedsa, pohua corimedsa naco huahuatidsemana najarade. Bani siricca

nanajano assaridenidsa, dsepedenidsa cajimanagerajari. Najarideni nahatonimanahi qqui onabaquijari. Nadsapa huajano 1,000 naha Cristo tedseje dsama huapima dossede toquejenaridsajari. ⁵ Ajjaropi madija tahide nahatoni-manapojaridenicca ima. Naraha tojicapojarideni motapa nahatonimana-jaracchahitohui. Huajano 1,000 naha jicadsana nahatonimanahitohui. ⁶ Madija nahatoni-manapojaridenidsa Diocca biquehe tojajaro. Pohuadeni bodi ssiajaquiri, huirequiri najari. Dsoqqehe dsotodecca pohuadenidsa nohueranitohui. (Najaropi najidsohue jiquejeranicca tonahanamanadsanapo-jarahitohui.) Nadsapa Diodsa, Cristodsa dsepedeni ijimanahitohui. Diodsa huahuati toquimade toquejena, dada toquimade toquejena nahitohui. Huajano 1,000 naha Cristo tedseje dsama huapima dossede toquejenaridsahitohui.

Diocca huadi Satana nanajidso tojahicca ima

⁷ Satanapa huajano 1,000 naha odi huaji tani bodidsa huedsaraha najari huajano jicadsapa tappa tadsa qquenahitohui. ⁸ Qquenadsapa dsama onihi onihidsa madirid-samanajarideni huapima ahuajicca, ahuajicca icamaidsa-baquiridsahitohui. Najaridenidsa: Cohuajicca madijadeni, Macocahuajicca madijadeni quiquinanajari. Najarideni Satana inequeriqquibaquijari, jadsire inamananijine. Huapi taja najari. Pina ssiqui potera tajaro hua inanijine ssamo tajarossa quinajari. ⁹ Nadsapa jadsiretohui quinajarideni jahijonana canajari. Dsama nemanehedsa ijimanajari. Diocca madija madimanahihuaji ijihuajani-manajari. Diocca cattaniji pocca odsa panani bicabote denihuajina cottaja-huajanimanaha jica najari. Naraha jororoni ppocorabote Dio dosse inaronajaro. Jadsiretohui jahijonajarideni diji tocanirea jicajari. ¹⁰ Diocca

Apocalipsis 20:11-15 Apocalipsis 20:14-15

huadi Satana madijadsa maidsa maidsa naridsapojari manaconipa coridsa imeni azufre jororo cananihuaji coro todsippajari. Nahihuajipa bani siri jidsabote, bani siri ohuaha maidsehe mamaride tedseje cororo todsippapojari. Nahidsapa dsome, ssiaja, dsome, ssiaja ocasserani ahuamana-dsanapohuitohui.

Diocca huihuittari bicabote nopo tocanajarodsa ima cattemade tojajari

¹¹ Nadsapa qqui onanaja pocca huihuittari bicabote nopo tocanajarodsa Dio huittarihi qqui onajari. Nahidsa huittaridsa pohua tedsejemapi meme tohuatora-ra amossi, nami tohuatora-ra amossi nadsapi nohuerade. ¹²⁻¹³ Ocattoma cananaja dsoqquemana-pojarideni Dio tedsejema domodeni huajari. Nahihuajipa deni toquejenajarideni domo hua, cappiramanajarideni domo hua najari. Aja passodsa je tocanirejarideni, dsamadsa jicajarideni, dsoqquemana-pojarideni huapima Diocca huihuittari bicabote tadsajanima domodeni huajari. Nadsapa dsoqquemana-pojaridenicca ima papeodsa dsodo napojaro itaboridsajaro. Aji pohuadenijine ima bicani inanaridsamanajaro, ima tabaccora tanicca inanaridsamanajaro naqui papeodsa dsodo naridsajarodsa ima cattemade tojajari. Nadsapi pina pohuadeni ima inanaridsamanajarossa nehe manaconi pohuadenidsa inanajaro. Papeo onihi naqui itabojaro. Najaro papeopi madija camittehe cajimana-dsanapohuijinecca. ¹⁴⁻¹⁵ Madija pohuadeni oni camittehe cajimana-dsanapohuijinecca papeodsa nohueradsapa coridsa jororo cananidsa hua todsippajari. Dsoqqehe coridsa imeni jororo cananihuaji coro todsippajaro. Dsoqqehecce cacahuehe naqui coro todsippajaro.

Najaro coridsa imeni jororo canajarocca imapi dsoqquehe dsotodecca.

21

Meme dsati, nami dsati najaro tahimarini

¹ Nadsapi qqui onapomaneje meme dsati, nami dsati qqui onajaro. Aji tahidecca meme, nami najaropi amossi najaro. Passo imeni naqui amossi najaro. ² Dio pocca odsa panani bicabote Jerosare dsati qqui onade. Dio Pohua ted-sejema memehuaji ccaronade. Jerosarepi pina amoneje maqqui cajinijine najorajarossa najaro, bicaridsaponi nade. ³ Nadsapi memehuaji Deni tojahicca huihuittari bicabote cahittarinihuaji tohuatti mohui tehe omittajaro: —Jidapapa Dio madijadsa madihi. Pohuadenidsa madi-dsanapohuitohui. Madija huapima Diocca cacahuehedsa toquejenahitohui. Diopa pohuadeni Cacahuade tojad-sanapohuitohui. ⁴ Pohuapa inocco ppajani sse inanitohui, denima oji inejeranijine. Iadsa Dio madidsapa dsoqquehe nohue, ojie nohue, ettima oji oji inajaro nohue, coma inajaro naqui nohueranitohui. Aji ima huapima namidsa caji tapojaropi jicanitohui —nade.

⁵ Nadsapa aja Deni tojahicca huihuittaridsa huittari canajari Attipa: —Ohuapi huapima dsati onanaridsahi —nade. Pohua Atti onihi naqui: —Ajijaro ima dsodo taji. Ajijaro imapi pajissa. Imapi pina ajijarossa nehe tojanitohui —nade. ⁶ Nadsapa ohuadsa huati tajari: —Ajijaro ima huati onajaropi tojanissa tehe jicani. Ohuapi Ohua. Ajijaro dsama nahatopo-jeradsama omadipojaro. Nidsa dsotode ajijaro dsama jicaraha Ohuapi omadi-dsanaponitohui. Madija bacco dsaridsapa passo camit-tehecca qqenajaro dse nahijine pohuadsa da onanitohui. Pohuadsa: Manaconi, onejeranitohui. ⁷ Aji

occa dacorehema timadimanadsa Ohuadsa jehe tiquinajaro tinebomana-jeradsapi jidacca huati huati onapojaro huapima tiadenidsa tojaridsanitohui. Ohuapi ticcadeni Dio ojanitohui. Tiadenipi occa ejedeni tiquejenanitohui. ⁸ Naraha Ohuadsa toquejena-jarajaridenipa najidsohue cajimanahitohui. Aja madija: “Jesocristopa ohua Idinide” quinahijine huatide cappinaquiqui najari, madija Jesocristodsa pajissa quina-jarajarideni, ima tabaccora taniccadsa disseraquiqui najarideni, madija pohua tesse nanadsoqquede dissera tajari najidsohue cajimanahitohui. Aja huananehecca disseraquiqui najarideni, dsopinejedeni, siba nahatonidsa huahuatidsemana najarideni, mamaidsadedeni naco najidsohue cajimanahitohui. Najarideni huapimapa coridsa imeni azufre jororo cananihuaji hua todsippahitohui. Najaropi dsoqqehe dsotodecca —nade. (Nanidsapi najidsohue jiquejeranicca tonahanamana-dsanapohuitohui.)

Jerotare dsati tahimarini

⁹ Nadsapa Diocca dodosse tabaqqi memehuaajicca 7 quinaha tasaodsa najidsohue oppina tanicca cajirid-samanapojari ojaría ccajonadsa ohuadsa huati tajari: —Aji ticcajonaji, Edede Bedicca amoneje tojanijine najorajaro tia qqui onanana —nade.

¹⁰ Nadsapi Dio Corimejine ima ohuadsa ahuato tajaró. Pina occa huadassa nadsa qqui onajaro. Ocattoma cananeje Diocca dodosse ssono dequeranihuaji ohua tohuaccajari. Nanihuaji ohuadsa ahuato inanajaro. Memehuaaji Dio pocca odsa panani bicabote Jerotare Dio Pohua tedsejema ccaronani qqui onade. ¹¹ Najaro odsa pananipi Dio pocca deni tojehe, pohua ssiejenejine dsibehi tajaró. Najaro dsibehinipi pina siba huatini ccara tanicca diamante dsibehinissa najaro. Ssiaja tajaró pina cristaossa

najaro. ¹² Odsa panani huapihuajipi siba hua nahuajanini dequerajaro. Motarema ccahuajanijaro. Noccobiji 12 nehe cajijaro. Najaro noccobijidsa Diocca dodosse tabaqqi ojari ojari naha huahueri naridsajari. Noccobijidsa onideni dsodo naridsajaropi jodiodenicca idi ojaria oni Isaraeri bedi 12 quinajari onideni. ¹³ Maji ccajonahuajipi noccobiji 3 nehe cajijaro. Maji toccahihuaji naqui noccobiji 3 nehe cajijaro. Arobenihuaji naqui noccobiji 3 nehe cajijaro. Arobeni onihihuaji naqui noccobiji 3 nehe cajijaro. ¹⁴ Odsa pananicca siba hua nahuajanijaro tocadacorate siba imeni 12 nehe cajijaro. Najaro siba 12 najarodsapi Edede Bedi Jeso pohua huatimadedeni 12 quinajari onideni dsodo naridsani qqui onade.

¹⁵ Aja Diocca dodosse ohuadsa huati tajaripa nanattome orocca dsibehi tajaro dsojo inajari. Najarodsada odsa panani, noccobiji, hua nahuajanini naqui nattomede tojaridsajari. ¹⁶ Nadsama odsa panani dequeranihuajipi pina bijini matanihuajissa caniquimerajaro. Diocca dodosse odsa panani nattome inadsapi 2 mil, 200 kilometros (2,200) cajijaro. Dequeranihuaji najarossa, bijini matanihuaji najarossa, tetepihuaji najarossa caniquimerajaro. ¹⁷ Nadsapi hua nahuajanini nattome inadsa sibanipi 65 metros. Najaro nanattomepi ajijaro nami nanattomedsa Diocca dodosse nattome inajaro.

¹⁸ Odsa panani huapihuajicca hua nahuajanijaropi diamantedsa nahatojaro. Odsa pananipi oro poniradsa canahatojaro. Najaro oropi pina jojo ssiaja tajarissa najaro, tocassiejequimera najaro. ¹⁹ Aji odsa pananicca hua nahuajanijaro tocadacorate siba imeni 12 quinajarodsapi siba bedeni dsibehini bicabote nepi naridsajaro. Siba bedeni janonipi onihi onihi naridsajaro. Oninipi ajima najaro: Tahidecca siba imenidsapi diamante dsibehi tajaro ijiridsajaro. Dsotodeccadsapi sapiro sohue tajaro

ijiridsajaro. Onihi 3'ccadsapi acata macconi janoni cajini ijiridsajaro. Onihi 4'ccadsapi esemeraoda sohueni ssiaja tajaro ijiridsajaro. ²⁰ Onihi 5'ccadsapi onise sohue tajaro noponidsa quejemajaro ijiridsajaro. 6'ccadsapi robi macco tajaro ijiridsajaro. 7'ccadsapi crisolito huesse tajaro ijiridsajaro. 8'ccadsapi berilo macconi, sohueni, huesseni ijiridsajaro. 9'ccadsapi topasio macco najararo ijiridsajaro. 10'ccadsapi crisoprasa sohueni huesse tajaro ijiridsajaro. 11'ccadsapi jasinto sohueni ijiridsajaro. 12'ccadsapi amatista sohueni idira tajaro ijiridsajaro. ²¹ Aji noccobiji 12 najaropi perla noponi dsibehi tajaro 12 nehe huacossaridsajaro. Perla ojariepi noccobijidsa ojari ojari naridsajaro. Odsa pananica jahui huapimapi dsibehini oro ponira ijijaro, tocassiejqquimera najaro.

²² Najaro odsa pananidsapi Diodsa dada toququima odsa qqui onejerani. Dio Atti mamari naqui nohuerajaro. Naraha ia Medsede Dio Dacorabotena nahidsa madijari. Edede Bedi Jeso naco nahidsa madijari. Iqueriqquidsa etidsenijinepi pohuadeni pamahadsana ehetidse nanijine. ²³ Diocca odsa pananidsapa maji nohue, abad-sico ssiejene nohuerahi. Ssiaja taridsajaropi Dio pocca deni tojehe, Pohua ssiejenena paji. Edede Bedi naco pina jojororossa najari, pohua ssiejene ssiaja taridsajari. ²⁴ Aji dsama onihi onihi naridsajarocca madija huapimapa najaro odsa panani ssiajanidsa madimanahitohui. Dsama onihi onihicca taminedeni naco poccadeni biquehe deni tojanicca Diodsa da quinanijine najaro odsa pananihuaji dsojo idsimamananitohui. ²⁵ Noccobiji tohuabehe nema dsanaponitohui. Dsomepi nohuerani. Ssiaja ponira nema dsanaponitohui. ²⁶ Dsama huapimacca madija poccadeni biquehe deni tojanicca Diodsa da quinanitohui. Poccadeni dsamacca biquehe naqui da

quinanitohui. ²⁷ Najaro odsa pananihuajipi Dio jipera tahicca nohueranitohui. Madija imasiri totonanadenipa jahidsima-jarahitohui. Madija mamaidsadedeni naco jahidsima-jarahitohui. Aja Edede Bedicca papeo camittehe cajimana-dsanapohuijineccadsa onideni dsodo naridsajaridenira jahidsimahi ojarhitohui.

22

¹ Nadsapa Diocca dodosse hueni bicahi ohua qqui tonanajaripa passo ssahua tajaro, tocassiejequimera najaro. Najaropi passo camittehecca. Dio, Edede Bedi pohuadeni pamahacca huihuittari cahittarinidsa passo qquenajaropi hueni tocajajari. ² Najari huenipa odsa pananica jahui nocconi motta tohuaccajari. Ahua camittehecca hueni inididsa ahuaaji hua, jippehuaji hua najari. Abadsico cajari cajari bobono najari. Huajano ojariadsa bono cajijaripa 12 najari. Najari ahua eppepa dsama huapimacca madija nomiquiri naha madimana-dsanapohuijine. ³ Najaro odsa pananihuajipi tabaccorehe nohue, Diocca najidsohue naqui nohueranitohui. Nanidsapi Dio, Edede Bedi pohuadeni pamahacca huihuittari cahittarinitohui. Diocca medse huapima pohuadeni pamahadsa huatidsemanahitohui, jiri jiri quiquinanahitohui. ⁴ Dio Pohua assire qqui quinahitohui. Pohua oni pocca medse huapima assaridenidsa dsodo naridsanitohui. Najaro imapi Dio Pohua pocca toquejenajari. ⁵ Nanidsapi dsome nohueranitohui. Nahihuaji madija madimanajaridenipa jojororo tohui, maji ssiejene tohui quina-jarahitohui. Ia Medsede Diona huapimadsa ssi-aja inaridsanitohui. Nadsapa Dio pocca medsedeni huapima dossede toquejena-dsanapohuitohui.

Jesocristo ccanipomahicca imapi huajira tani

⁶ Nadsapa Diocca dodosse ohuadsa huati tapomajari: —Ajijaro imapi pajissa. Imapi pina ajijarossa nehe tojanitohui. Ia Medsede Diopa Pohua Atti cacomeraquuri najaridenidsa Pohua Atti inanaridsapojaro. Najari Diopa ohua dosse naronajari. Ohuapi pocca dodosse, pocca medsedenidsa pohuadeni tedsejemacca ima tojabote nanicca ahuato onananijine occaronajaro —nade ohuadsa.

⁷ Ia Medsede Jeso attipa: —Occanibote nani —najari. —Diocca ima itedsejemacca ajijaro papeodsa dsodo nanidsa ibora tajaripa occa biquehe pohuadsa onananitohui —nade.

⁸ Ohuapi Huano, aji jidapanacca, itedsejemacca Djojine huapima ohuadsa ahuato inanadsa omittajaro, qqui onajaro. Najaro jicadsapi Diocca dodosse ohuadsa huati huati tajari baccohuaji opitodsa ohuittajaro, pohuadsa ohuatid-senijine. ⁹ Naraha pohua attipa: —Nema tejeraji. Ohuapi Diocca medse ojani. Pina tiassa, pina timecotedeni Dio Atti cacomeraquuri najaridenissa onajaro. Aja madija huapima ajijaro ima papeo dsodo nanidsa iboraquuri najaridenissa onehe Diocca medse ojani. Diodsara tetidseji —nade.

¹⁰ Pohua atti onihi naqui: —Diocca ima ajijaro papeodsa dsodo najaropi madija hua hua quinahijine ahuatoranidsa tecahua tejeraji. Ajijaro ima dsodo nanicca tojanijinepi huajira tani. ¹¹ Najaro ima tohuajiradsapi madija tabaccora tajari, bodi oba tajari naco poccadeni tabaccorehe inanamanaccanijine. Apaja, bodideni cacajiquimerahijine pajiramana-jarahi. Naraha madija bica tajari, bodi huire tajari naco ima bicani inanamana-dsanaponijine bica tani —nade Diocca dodosse ohuadsa.

¹² Ia Medsede Jeso attipa: —Jehe, occanibote nani. Ima bicani inanaridsa-manajarodenipa najarossa nehe pohuadenidsa da onaridsanitohui. Naraha ima tabaccora

tanicca inanaridsa-manajarodenipa najarossa nehe pohuadenidsa da onaridsanitohui. ¹³ Ohuapi ohua. Ajijaro dsama nahatopo-jeradsama omadipojaro. Nidsa dsotode ajijaro dsama jicaraha ohuapi omadi-dsanaponitohui —nade Jeso.

¹⁴ Nadsapa madija pina poccadeni etero ssahua quinarossa nadsa bodideni tohuireridsadsapa Dio pocca biquehe pohuadenidsa inanaridsanitohui. Najaridenipa ahua bono camittehecca jipamanahi bica tahi. Diocca odsa pananicca noccobijidsa jai tojedsimahi naco bica tahi. ¹⁵ Naraha aja madija Jesocristodsa pajissa quinarajarideni, dsoppineje doridsa disseraquiri najarideni, huananehedsa disseraquiri najarideni, ijinedeni ahua-manajarideni, siba nahatonidsa huahuatidsemana najarideni, maidsehedsa disseraquiri najarideni, pohua tesse mamaidsadedeni, najarideni huapimapa Diocca odsa pananidsa jai tojedsima-jarahitohui.

¹⁶ —Ohuapi Jeso, otahimaridsa titiqueriqquiridsamana najarodenidsa occa dodosse memehujicca dosse onaronajari, najaro ima nemaneha timittamananijine —nade. —Ohuapi maittaccadsama Isaraeri potemahidenicca tamine Dabi Potemahi ojani. Ohuapi pina dsidsidsamassacca abadsico bedi ssiaja tocanajarissa onajaro —nade Jeso.

¹⁷ —Nija, ticcajonaji —quinahi Dio Corime, Edede Bedicca amoneje tadsajani. (Najaro amonejecca imapi Jesocristodsa ihiqueriququi najarocca ima.) Madija ajijaro ima mittamanajarideni naco: —Jehe, ticcajonaji —quinana. Passotohui bacco dsarijari dsede jipa tadsapa ccajonana, passo camittehecca manaconi jirehe dse nahijine.

¹⁸ Diojine ahuatojaro itedsejemacca imapi ajijaro pa-peodsa dsodo nani mittamanajaridenidsa ohuatti ajima

onajaro: Madijapa ajijaro imadsa ima onihi inaharini oppina tani. Ima onihi tonaharidedsapa Dio pohuadsa ima oppina tanicca inassonarinitohui. Ajijaro papeodsa dsodo nanicca ima oppina tanicca pohuadsa tojanitohui.

¹⁹ Nadsama madija ohuaha itedsejemacca ima ajijaro papeodsa dsodo nanicca mota inebodsapi manaco Dio pohuadsa ahua bono camittehecca eccoccohuitohui. Odsa panani Jerosare naqui pohuadsa eccocconitohui.

²⁰ Ajijaro ima huapimapi Jesocristo huati tajaricca. Iadsa pohua attipa: —Pajissa, occaninijine huajira tani —nade.

Nadsapi ia etti: —Pajissa nema nana. Ia Medsede Jeso ticcaniji —inajaro.

²¹ Ia Medsede Jesocristo tiadeni huapimadsa ima bicani inanana, onajaro. Pajissa nema nana. Epejeni.

El Nuevo Testamento en el idioma Culina (mádjia) del
Perú

Kulina: El Nuevo Testamento en el idioma Culina (mádjia) del Perú
New Testament

copyright © 2014 Wycliffe Bible Translators, Inc.

Language: Culina (Kulina)

Contributor: Wycliffe Bible Translators, Inc.

All rights reserved.

2020-11-16

PDF generated using Haiola and XeLaTeX on 14 Jun 2022 from source files dated 30 Nov
2021

4c7c82dd-1f0f-5341-b6e6-26970c27fee2